



টাঁড়বাঘোয়া

বুদ্ধদেব গুহ

ট ড়বাবোয়া

বুদ্ধদেব গুহ



আনন্দ পাবলিশার্স প্রাইভেট লিমিটেড
কলিকাতা ৯

প্রথম সংস্করণ নভেম্বর ১৯৬১

প্রচ্ছদ ও অঙ্কন সঞ্জয় ভট্টাচার্য

আনন্দ পাবলিশার্স প্রাইভেট লিমিটেডের পক্ষে ফণিভূষণ দেব কর্তৃক
৪৫ বেনিয়াটোলা লেন কলিকাতা ৭০০০০৯ থেকে প্রকাশিত এবং
আনন্দ প্রেস এন্ড পাবলিকেশনস প্রাইভেট লিমিটেডের পক্ষে
ষিঙ্কেন্দ্রনাথ বসু কর্তৃক পি ২৪৮ সি. আই. টি. স্কীম
নং ৬ এম কলিকাতা ৭০০০৫৪ থেকে মুদ্রিত।

ট াড়বাঘোয়া

তোমরা কেউ বাড়্‌কাকানা থেকে চৌপান্‌ যে রেল লাইনটি চলে গেছে পালামোর গভীর জঙ্গলের মধ্য দিয়ে সেই পথে গেছ কী না জানি না। না-গিয়ে থাকলে একবার যেও। ছ'পাশে অমন সুন্দর দৃশ্যের রেলপথ খুব কমই আছে। শাল, মহুয়া, আসন, পন্নন, কেঁদ, পিয়াশাল, চৌওয়া, পলাশ, শিমুল আরও কত কী নাম জানা এবং নাম না-জানা গাছ-গাছালি। ছিপছিপে, ছিমছাম ঝিরঝিরে নদী। মৌন মুনির মত সব মন-ভরা পাহাড়। মাইলের পর মাইল ঢালে, উপত্যকায়, গড়িয়ে-যাওয়া সবুজ জামদানী শালের মত জঙ্গল। এক এক ঋতুতে তাদের এক এক রূপ।

এই বেলপথে লাপুবা বলে একটি ছোট্ট স্টেশান আছে। তার এক পাশে খিলাড়ি, অন্য় পাশে মহুয়ামিলন। মহুয়া-মিলনের পর টোরী।

দ্বিতীয় বিশ্বযুদ্ধের সময় এই লাপুবা স্টেশানটির নাম ছিল আণ্ডা-হন্ট্‌। ব্রিটিশ ট্রমি আর আমেরিকান সৈন্য় ভর্তি মিলিটারী ট্রেন এখানে থামত রোজ্‌ ভোরে—প্রাতঃরাশ-এর জন্য়।

যখনকার কথা বলছি, তখন তোমরা অনেকেই হয়ত জন্মাতনি। যে সময়কার এবং যে সব জায়গার কথা বলতে বসেছি, সেই সময় এবং সেই সব সুন্দর দিন ও পরিবেশ বিলীয়মান দিগন্তের মতই দ্রুত মিলিয়ে যাচ্ছে, মুছে যাচ্ছে।

তাই হয়ত মনে থাকতে থাকতে এসব তোমাদের বলে ফেলাই ভাল ।

লাপ্‌রার কাছে চট্ট নদী বলে একটি নদী আছে । ভারী সুন্দর নদীটি । পিকনিক করতে যেতেন অনেকে দল বেঁধে । সেই সময় লাপ্‌রাতে এ্যাংলো ইণ্ডিয়ানরা একটি কলোনী করেছিলেন । ফুটফুটে মেয়েরা গোলাপী গাউন পরে, মাথায় টুপী চড়িয়ে গরুর গাড়ি চালিয়ে যেতো লাল ধুলোর পথ বেয়ে, ক্ষেতে চাষ করত, পাহাড়ী নদীতে বাঁধ বেঁধে সেচ করত সেই জমি । পালামোর এসব রাঁচী অঞ্চলের এমনই মজা ছিল যে, গরমের সময়ও কখনোই রুক্ষ হতো না । প্রায় সব সময়ই সবুজ, ছায়াশীতল থাকত । এপ্রিল মাসের মাঝামাঝিও রাতে পাতলা কঞ্চল দিতে হতো গায়ে । সন্ধ্যার পর বাইরে বসলে সোয়েটার বা শালের দরকার হতো ।

আমি তখন কলেজে পড়ি । ফারস্ট ইয়ার । কলেজের গরমের ছুটিতে মহুয়ামিলন আর লাপ্‌রার মাঝামাঝি একটি জায়গাতে গিয়ে উঠেছি । সঙ্গে আমার এক সাগরেদ টেড । টেডএর বাবা আমার বাবার সঙ্গে এক অফিসে কাজ করতেন । অস্ট্রিয়াতে টীরল বলে একটি বড় সুন্দর প্রদেশ আছে । সেখানেই তার পৈতৃক নিবাস । কিন্তু তার বাবার সঙ্গে ভারতবর্ষেই টেড ছিল অনেক বছর । জন্মেও ছিল সে এখানে । আমরা দুজনে অভিন্ন-হৃদয় বন্ধু ছিলাম ! বনে-জঙ্গলে টেডএর সঙ্গে যে কত ঘুরেছি আর শিকার করেছি সেই সময়—সেসব কথা এখন মনে হয় স্বপ্ন ।

এখন টেড আছে কানাডাতে । ছোটবেলায় ভারতবর্ষের

জঙ্গলে ঘুরে তার জঙ্গলের নেশা ধরে গেছিল, তাই কানাডার জঙ্গলে বিরাট কাঠের কারবার কেঁদেছে সে বড় হয়ে। তিন চার বছর অন্তর টেড আমাকে প্রায় জোর করেই নিয়ে যায়। টিকিট কেটে পাঠায় ওখান থেকে। কানাডার বনে জঙ্গলে এখন আমিই ওর সাগরেদ হয়ে ঘুরে বেড়াই।

সেদিন বিকেলে, একটা ছোট্ট পাহাড় ছুলোয়া করিয়ে ময়ূর তিতির ও মুরগী উড়িয়েছিলাম আমরা। তবে, খানেওয়াল মাত্র আমরা ছজন। সঙ্গে আছেন টিরিদাদা। টিরি ওঁরাও। তিনি একাধারে আমাদের অনুচর, বাবুচি, গান-বেয়ারার বা বন্দুকবাহক এবং লোকাল গার্জেন। তাই অনেক পাখি উড়লেও তিনজনে দিন-তুই খাওয়ার মত ছোটো মোরগ আর ছোটো তিতির শুধু মেরেছিলাম আমরা।

ময়ূর মারতাম না কখনও আমাদের কেউই। একবার শুধু, কেমন খেতে লাগে তা দেখবার জগ্গে অনেকদিন আগে মেরেছিলাম একটা। তোমরা বোধহয় অনেকেই জানো না, ময়ূরের মাংস হচ্ছে পৃথিবীর সবচেয়ে স্বাদু ও নরম হোয়াইট-মীট।

টিরিদাদা রান্না-টাঙ্গা করছে, আমরা বাংলোর বাইরে বেতের চেয়ারে বসে গল্প করছি। কাল-পরশু সবে অমাবস্তা গেছে। তখনও চাঁদ ওঠেনি, ফুরফুর করে হাওয়া দিয়েছে। মছয়া আর করৌঞ্জের গন্ধ ভেসে আসছে সেই হাওয়াতে। অন্ধকার বন থেকে ডিউ-ডা-ডু-ইট পাখি ডাকছে। কোনো জানোয়ার দেখে থাকবে হয়ত ওরা।

এমন সময় দেখি মশাল আলিয়ে আট দশজন লোক দূরের

পাকদণ্ডী পথ বেয়ে গভীর জঙ্গলের মধ্যে দিয়ে জ্বোরে জ্বোরে কথা বলতে বলতে আমাদের বাংলোর দিকেই আসছে।

সন্ধ্যার পর এই জঙ্গলে জায়গায় বিশেষ প্রয়োজন ছাড়া কেউই বড় একটা ঘর ছেড়ে বাইরে বেরোয় না। এত লোক এক সঙ্গে কোথা থেকে আসছে সেই কথা ভাবতে ভাবতে আমরা চেয়ে রইলাম নাচতে-থাকা মশালের আলোগুলোর দিকে।

বিকেলে মুরগী মারার সময় যারা ছুলোয়া করেছিল, তারা মহুয়ামিলনের আশেপাশের বস্তুরই সব ছোট ছেলে। তাদের আমরা এক আনা করে পয়সা দিতাম, তিন-চার ঘণ্টা ছুলোয়ার জন্মে। তখনকার এক আনা অবশ্য এখনকার পাঁচ টাকার সমান। তাই ভীড় করে আসত ওরা ছুলোয়া করার জন্মে। সেদিনই টেডের বন্দুকের ছব্রাগুলি ঝরঝর করে একটা কেলাউন্দা ঝোপের গায়ে গিয়ে লাগে, তার পাশেই ছিল একটি ছেলে। এমন বোকার মত বেজায়গায় এসে পড়েছিলো ছেলেটা যে, একটু হলে তার গায়েই গুলি লেগে যেত! তার গায়ের পাশে গুলি লাগতে সে অনেকক্ষণ হতভম্ব হয়ে মাটিতে বসে ছিল। টিরিদাদা গিয়ে তাকে তুলে ধরে, টিকি নাড়িয়ে তার যে কিছুই হয়নি একথা বুঝিয়ে তার ঠোঁটের কাঁকে একটু খৈনী দিয়ে দিয়েছিল। অতটুকু ছেলে খৈনী খায় দেখে আমরা অবাক হয়ে গেছিলাম।

এই লোকগুলো আসছে কেন কে জানে। ছেলেটার গায়ে সত্যি সত্যিই কি গুলি লেগেছিল? শিকারে গিয়ে মাঝে মাঝে এমন এমন সব ঘটনা ঘটে যে, তখন মনে হয় বন্দুক

রাইফেলে আর জীবনে হাত দেবো না। আমার ছোট ভাই-
এর একটা ফুসফুস ত কেটে বাদই দিতে হল! এক বে-আক্কেল
সঙ্গীর বে-নজীর বন্দুকের পাখি-মারা-ছব্বা তার একটা
ফুসফুসকে ছিন্নভিন্ন করে দিয়েছিল।

সবই জানা আছে। মানাও। তবুও কিছুদিন যেতে না
যেতেই জঙ্গল আবার হাতছানি দেয়। কানে ফিস্‌ফিস্‌ করে
জঙ্গলের কানাকানি, পাখির ডাক, শব্বরের গভীর রাতের
দূরগত ঢাংক ঢাংক আওয়াজ, চিতাবাঘের গোঙানী। আর
নাকে ভেসে আসে জঙ্গলের মিশ্র গন্ধ। ফোটা-কাতুঁজের
বাকুদের গন্ধের সঙ্গে মিশে ঘুমের মধ্যে, ভীড়ের মধ্যে,
পড়াশুনার মধ্যে অশরীরি হাওয়ার মত জঙ্গল যেন হাত
বোলায় গায়ে মাথায়। তাই আবারও বেরিয়ে পড়তে হয়।
নানারকম বিপদ আছে বলেই হয়ত জঙ্গল এত ভাল লাগে।

লোকগুলো গেট পেরিয়ে বাংলোর হাতায় ঢুকে পড়ে
একেবারে কাছে এসে আমাদের সামনে মাটিতে বসে পড়ল।
বুঝলাম, অনেক পথ হেঁটে এসেছে ওরা। ওদের মধ্যে যে
সর্দার গোছেয়, সেই শুধু দাঁড়িয়েছিল। সে বলল যে, তারা
পলাশবনা বলে একটা গ্রাম থেকে আসছে অনেকখানি
হেঁটে। তাদের বস্তীতে একটা মানুষখেকো বাঘের উপদ্রব
আরম্ভ হয়েছে। গ্রামকে ওরা বলে বস্তী। পনেরো দিন
আগে কাঠ কুড়োতে যাওয়া একটি মেয়েকে সেই বাঘে
ধরেছিল। ওরা ভেবেছিল যে, বাচ্চা মেয়েটা বুঝি হঠাৎ ভুল
করেই গিয়ে পড়েছিল ভীষণ গরমে ক্লান্ত হয়ে-যাওয়া ছায়ায়
বিশ্রাম-নেওয়া বাঘের সামনে। কিন্তু আজই বিকেলে গ্রামের

মধ্যে ঢুকে অনেকের চোখের সামনেই কুয়োতলা থেকে আবার একজন বুড়িকে তুলে নিয়ে গেছে বাঘটা। তাই বাঘটা যে মানুষখেকোই সে বিষয়ে তাদের কোনোই সন্দেহ নেই আর!

কথাবার্তা শুনে টিরিদাদা 'এসে দাঁড়িয়েছিল আমাদের পেছনে।

আমি বললাম, দাঁড়িয়ে দেখছো কি টিরিদাদা? এতদূর থেকে এসেছে ওরা, ওদের প্যাঁড়া দাঁও, জল খাওয়াও। ওদের জগে খাওয়ারও একটু বন্দোবস্ত করো। তুমি ত একা এত লোকের খাবার বানাতে পারবে না! ওদের জল-টল খাওয়া হলে ডেকে নাও ওদের, তারপর সকলে মিলেই হাতে হাতে রুটি বানিয়ে ফেল। নইলে ভাত কর। ঝামেলা কম হবে। মাংস ত আছেই। যা আছে তাতে হয়ে যাবে।

টিরি বলল, নিজের খাওয়া আর সকলের খাওয়া-খাওয়া করেই তুমি মরলে।

টেড হিন্দী बोখে। বলতেও পারে। টিরিকে বলল, তুম বহত বকুবকাতা হয়।

আমি সর্দারকে শুধোলাম, বুড়ির মৃতদেহ কি তোমরা উদ্ধার করতে পেরেছো?

না বাবু. ও বলল।

কেন? সকলে মিলে আলো-টালো নিয়ে গেলে না কেন? গ্রামে কী একটাও বন্দুক নেই?

আছে। টিকায়ের আছে। তার বিলিতি বন্দুক আছে একনলা। তার কাছে গেছিলামও আমরা। কিন্তু সে বলল, একটা মরা বুড়ির জগে রাতবিরেতে নিজের শ্রাণ খোয়াতে



রাজী নয় সে । কাল দিনেরবেলা আমাদের গিয়ে দেখে আসতে বলেছে । বুড়ির সবটুকু যদি বাঘ খেয়ে না ফেলে থাকে, তাহলে সেইখানে ভাল বড় গাছ দেখে মাচা বাঁধতে বলেছে আমাদের । সেই মাচায় বসবে বিকেলে গিয়ে । এবং বলেছে বাঘটাকে মারবে ।

টেড বলল, তাহলে ত বন্দোবস্ত হয়েই গেছে । তোমরা আমাদের কাছে এই এতখানি পথ ঠেঙ্গিয়ে আসতে গেলে কেন ?

সর্দার বলল, এই টিকায়েতই তো গতবছরে নতুন বন্দুক কেনার পর বাঘ মারবে বলে গরমের সময়ে জলের পাশে বসে ছিল । বাঘ যখন জল খেতে এসেছিল, তখন তাকে গুলিও করে বিকেল বেলায় । ঐ ত যত ঝামেলার ঝাড় ।

আমি বললাম, খারাপটা সে কি করল তোমাদের ?

সর্দার বলল, বাঘটা মারতে পারলে ত হতোই । বাঘ ছুঁকার ছেড়েই পালিয়ে গেছিল গায়ের গুলি ঝেড়ে ফেলে দিয়ে ।

সর্দার একটু চুপ করে থেকে বলল, কী আর বলব, আজ প্রায় সাত-আট বছর হলো বাঘটা এই অকলেই ঘোরাফেরা করত, কারো কোনোই ক্ষতি করত না কখনও, এমন কি গ্রামের গরু-মোষও মারেনি । শুধু টিকায়েতের বেতো-ঘোড়া মেরেছিল একটা ।

ওদের মধ্যে একজন সর্দারকে শুধরে দিয়ে বলল, একবার শুধু একটা গাধা মেরেছিল বস্তীর ধোপার ।

সঙ্গে সঙ্গে সর্দার তাকে থামিয়ে দিয়ে বলল, আমাদের মনে

হয় টিকিয়েতের ঐ গুলিতে আহত হয়েই, বাঘটার শরীরে জোর কমে গেছে। তাই ত বোধহয় ও আর জঙ্গলের জানোয়ার ধরতে পারে না। সেইজগ্নেই এখন মানুষ ধরা আরম্ভ করেছে। ওকে বস্তীর সকলেই চেনে, কারণ পলাশ-বনার ছোট বড় প্রায় সকলেই কখনও না কখনও দেখেছে ওকে।

একটু থেমে বুড়ো সর্দার বলল, আমরা আগে ওকে আদর করে ডাকতাম টাঁড়বাঘোয়া বলে। অনেকে পিলাবাবাও বলত। আমাদের বস্তীর আর জঙ্গলের মধোর খোলা টাঁড়ের মধ্যে দিয়ে প্রায়ই সকালে অথবা সন্ধ্যায় ওকে ধীরে স্নেহে যেতে দেখা যেত।

বুড়োর কথা শুনে টেড আর আমি মুখ চাওয়াচাওয়ি করলাম। বিহারের হাজারীবাগ পালামৌ জেলাতে বিস্তীর্ণ ফাঁকা মাঠকে বলে টাঁড়। টাঁড়ের মধ্যে দিয়ে যাতায়াত করত বলেই ওরা টাঁড়বাঘোয়া বলে ডাকত বাঘটাকে। মানে, টাঁড়ের বাঘ। বাঘ সাধারণতঃ ফাঁকা জায়গায় বেরোয় না দিনের বেলা। কিন্তু এ বাঘটা সকাল সন্ধ্যার আলোতে মাঠের মধ্যে দিয়ে যাতায়াত করত বলেই ওরকম নাম হয়েছিল বোধহয়।

টেড বলল, কত বড় বাঘটা ?

সর্দার বলল, দিখ্কে আপকো দিমাগ্ খারাপ হো জায়গা হজোর। ইত্না বড়কা। বলে, নিজের বুকের কাছে হাত তুলে দেখিয়ে বলল।

আমি বললাম, বাঘটাকে পিলাবাবা বলে ডাকত কেন কেউ কেউ, তা বললে না ত ?

বুড়ো বলল, হলুদ রঙের ছিল বাঘটা, ইয়া ইয়া দাড়ি
গোঁফওয়ালা, তাই অনেকে বলত পিলাবাবা। হিন্দীতে পিলা
মানে হলুদ। বিহারের বাঘের গায়ের রঙ সচরাচর পাটকিলে
হয়। টাড়াবাঘোয়ার রঙ হলুদ বলেই তার অমন নাম।

টেড জিগগেস করলো, তোমাদের গ্রাম কত মাইল হবে
এখান থেকে।

ওরা এবার একসঙ্গে সকলে কথা বলে উঠল।

বলল, জঙ্গলে জঙ্গলে গেলে লাতেহারের দিকে দশ মাইল।
পি-ডাব্লু-ডির রাস্তায় গেলে কুড়ি মাইল—তাও রাস্তা ছেড়ে
আবার পাঁচ-ছ' মাইল হাঁটতে হবে।

আমি বললাম, তোমাদের গ্রামে আমাদের থাকতে দিতে
পারবে ত? কোনো খালি ঘর-টর আছে?

বুড়ির ঘরই ত আছে, ওরা বলল।

তারপর বলল, বুড়ির কেউই ছিল না। এক নাতি ছিল,
গত বছরে এমনই এক গরমের দিনে একটা বিরাট কালো
গছমন্ সাপ তাকে কামড়ে দেয়। ওঝা কিছুই করতে পারলো
না। মরে গেল সে।

তারপর বলল, আপনাবা গেলে আমরা আমাদের
নিজ্জদের ঘরও ছেড়ে দেবো। আপনাদের কোনো কষ্ট দেবো
না। দয়া করে চলুন আপনারা মালিক।

কলেজে-পড়া সবে-গোঁফ-ওঠা আমাদের, এমন বার বার
মালিক মালিক বলাতে আমাদের খুবই ভালো লাগতে
লাগল। বেশ বড় বড় হাব-ভাব দেখাতে লাগলাম। আবার
একটুও লক্ষ্যও করতে লাগল। এখনও নিজ্জদের মালিকই হতে

পারলাম না, তা এতজন লোকের মালিক ! টিরিদাদাকে ডেকে, ওদের সকলকে সঙ্গে করে নিয়ে গিয়ে খাওয়াতে বললাম ।

ওরা যখন চলে গেল তখন আমি আর টেড পরামর্শ করতে বসলাম ।

এর আগে আমাদের ছুজনের কেউই কোনো মানুষকে বাঘ মারিনি । আমি ত বড় বাঘও মারিনি । টেড অবশ্য মেরেছিল একটা, উড়িঘ্যার চাঁদকার জঙ্গলে, যখন ও ক্লাস টেন-এ পড়ে । দিনের বেলা, মাচা থেকে ।

টেড অনেকবার আমাকে বলেছে আগে, বাঘটা এমন বিনা ঋমেলায় মরে গেল যে, একটুও মনে হলো না যে বাঘ মারা কঠিন । থ্রি-সেভেনটি-ফাইভ ম্যাগনাম রাইফেলের গুলি ঘাড়ে লেগেছিল সাত হাত দূর থেকে । বাঘটা মুখ খুবড়ে পড়েই ভীষণ কাঁপতে লাগল । মনে হলো, ম্যালেরিয়া হয়েছে, গায়ে কয়লা চাপা দিলেই জ্বর ছেড়ে যাবে । তা নয়, ঘাড়ের ফুটো দিয়ে প্রথমে কালচে, তারপর লাল রক্ত বেরোতে লাগল আর বাঘটা হাত পা টানটান করে ঘুমিয়ে পড়লো । যেন রাত জেগে পরীক্ষার পড়া পড়ে খুবই ঘুম জমেছিল ওর চোখে । যেন সাধ মিটিয়ে ঘুমোবে এবারে ।

টেডের প্রথম বাঘ অমন লক্ষ্মী ছেলের মত মরলেও টেড ও আমি খুব ভালই জানতাম যে বাঘ কী জিনিস ! বড় বাঘের সঙ্গে মোলাকাৎ আমাদের বছবার হয়েছে—জঙ্গলে, পায়ে হেঁটে । যেই না চোখের দিকে তাকিয়েছে বাঘ, অর্মানি মনে হয়েছে যে, এ্যাডিশনাল ম্যাথমেটিকস্-এর পরীক্ষা যে ভীষণই খারাপ দিয়েছি অথচ কাউকে বাড়িতে সে খবরটা এপর্ষন্ত

জানাইনি তাও যেন বাঘটা একমুহূর্তে জেনে গেল। বাঘ চোখের দিকে চাইলেই মনে হয় যে, বৃকের ভিতরটা পর্যন্ত দেখে ফেলল।

একে বাঘ। ভায় আবার মানুষখেকো!

টেড বলল, বাড়িতে টেলিগ্রাম করে বাবার পারমিশান চাইব? তুইও চা। আফটার অল মানইটার বাঘ বলে কথা।

আমি বললাম, তোর যেমন বুদ্ধি! পারমিশান চাইলেই সঙ্গে সঙ্গে আর্জেন্ট টেলিগ্রাম আসবে, কাম ব্যাক্ ইমিডিয়েটলি।

টেড বলল, সেকথা ঠিকই বলেছিস। বাবা-মার পারমিশান নিয়ে কে আর কবে এরকম মহৎ কর্ম করেছে বল।

আমি বললাম, কোনো খারাপ কর্মও কখনও করেনি কেউ, কি বল?

ও বলল, তাও যা বলেছিস।

তারপর বলল, থাকতেন আমার মা বেঁচে! মা দেখতিস রিটার্ন-টেলিগ্রাম করতেন, বাঘের চামড়া না-নিয়ে ফিরলে, তোমারই পিঠের চামড়া তুলবে। বাবাও অবশ্য আগে সেরকমই ছিলেন। তবে জানিস ত, মা চলে গেলেন এত অল্প বয়সে, আমার ত আর ভাই-বোন নেই, আমিই একা; বাবা এখন বড় নরম হয়ে গেছেন আমার ব্যাপারে। নইলে বাবা ঠিকই উৎসাহ দিতেন।

আমি বললাম, তোর বাবা-মা ত আর বাঙালী নন। তুই ত রবীন্দ্রনাথ পড়িসনি। রবীন্দ্রনাথ লিখেছিলেন,

সাতকোটি সম্ভানেরে হে মুক্ত জননী, রেখেছো বাঙালী করে
মানুষ করোনি ।

টেড বলল, আমরা ভীষণ বাজে কথা বলছি । এবার
কাজের কথা বল ।

বলেই বলল, টস্ করবি ?

আমি বললাম, হুস্ হুস্ । টস্ করা মানেই একজন জিতবে
অন্যজন হারবে । হারাহারির মধ্যে আমি নেই । তুইও
থাকিস না । আমরা হারতে আসিনি । কখনও হারব না
আমরা ! জিতবোই । আমরা যাচ্ছি । ডিসাইডেড ।

টেড কিছুক্ষণ বাইরের অন্ধকার রাতে তাকিয়ে থেকে
আমার দিকে ওর হাতটা বাড়িয়ে দিল ।

ওর টেনিস-খেলা শক্ত হাতের মধ্যে আমার হাতটা নিয়ে
বলল, সো, ছু পুওর ম্যানইটার ইজ ওলরেডী ডেড ।

বলেই হাসল ।

আমি ওর হাতটা আমার হাতে ধরে হাসলাম ।

বললাম, ইয়েস্ । হি ইজ্ । অ্যাজ্ ডেড অ্যাজ্ হ্যাম ।

টেড বলল, আই ! হি বললি কেন ? বাঘ কী বাঘিনী
আমরা ত জানি না এখনও ! গিয়েই জানব ।

আমি বললাম, ঠিক ।

টিরিদাদা এসে বলল, ওদের প্যাড়া আর জল খাইয়েছি ।
রুটি বানানো শুরু হয়ে গেছে । দেড় ঘণ্টার মধ্যেই খাওয়া-
দাওয়া শেষ হবে । ভাত-ফাত খেতে ভালোবাসে না ওরা ।
পনেরো মিনিটের মধ্যেই পেট খালি-খালি লাগে নাকি ভাত
খেলে ।

টিরিদাদাকে উদ্দেশ্য করে টেড বলল, বাঁধা-ছাঁদা করে আমরাও ওদের সঙ্গে বেরিয়ে পড়ব। আজ রাতারাতিই ওদের গ্রামে পৌঁছতে হবে। বুড়িকে খাওয়ার পরও যে পলাশবনা গ্রামেই মৌরসী-পাট্টা গেড়ে বসে থাকবে বাঘ তার ত কোনো গ্যারান্টি নেই।

টিরিদাদা আপত্তির গলায় বলল, এই রাতে! সাপ-সোপ্ আছে।

আমি বললাম, ভূত প্রেতও আছে টিরিদাদা!

টিরিদাদা বলল, বাসস্, বাসস্। রাতের বেলা আবার ওদের নাম করা কেন? বড় বেয়াদব হয়েছে।

টেড হাসল। বলল, শোনো টিরি; ওদের সঙ্গে তুমিও খেয়ে নেবে ভাল করে, আর আমাদের খাবারটা এখানেই দিয়ে যেও সকলের খাওয়া হয়ে গেলে।

টিরিদাদা বলল, মোরগ আর তিতিরগুলো সবই কেটে ফেললাম। তারপর এক বালটি পানি আর একগাদা লংকা ফেলে এমন ঝোল বানাচ্ছি যে, যারা তোমাদের প্রাণে মারার জন্তে নিতে এসেছে তাদের প্রাণ আজ আমার হাতেই যাবে। ওদের কারোই বাঘের মুখ অবধি পৌঁছতে হবে না হয়ত আর এই ঝোল খাবার পর।

টেড হাসল।

তারপর বলল, তুমি আজকাল কথা বড় বেশী বকছো, কাজ কম করছো টিরি। যাও, পালাও এখানে থেকে।

টিরিদাদা সত্যা সত্যিই চটে গেছে মনে হলো এবার।

বলল, তোমাদের দুজনের কারোও যদি কিছু হয় তাহলে

আমি তোমাদের বাবাদের কাছে কোন্ জবাবদিহিটা করব, সে কথা একবারও ভেবেছো? সবে কলেজে উঠেছো, এখনও ভালো করে গৌফ পর্যন্ত গুঠেনি, সব একেবারে লায়েক হয়ে গেছো দেখি তোমরা! লায়েক! কেন যে মরতে আমি এখানে ফেসেছিলাম! সঙ্গে এসেছিলাম।

আমি বললাম, আমরা বশু লিখে সই করে দিয়ে যাব যে, আমাদের মৃত্যুর জন্তে টাঁড়বাঘোয়াই দায়ী, টিরিদাদা দায়ী নয়।

টাঁড়বাঘোয়া? সেটা আবার কি?

টিরিদাদা কাঁচা পাকা ভুরু তুলে শুধোলো।

টেড বলল, বাঘটার নাম গো, বাঘটার নাম। এত বড় বাঘ যে, দেখলে নাকি দিমাগ্‌ই খারাপ হয়ে যাবে।

টিরিদাদা বলল, আমার দিমাগ বাঘ না দেখেই খারাপ হচ্ছে। ভাল লাগছে না একটুও। আমার মন একেবারেই সায় দিচ্ছে না। কী বিপদেই যে পড়লাম!

পলাশবনা গাঁয়ের কাছাকাছি আসতেই আমাদের ঘণ্টা আড়াই লেগে গেল। ইচ্ছে করেই মজুমিলনে খাওয়া-দাওয়ার পর বিশ্রাম নিয়ে আমরা রাত দেড়টা নাগাদ ওখান থেকে বেরিয়েছিলাম যাতে ভোর ভোর এসে পলাশবনাতে পৌঁছতে পারি।

পথের এক জায়গায় একটা বেশ উঁচু এবং গভীর জঙ্গলে ভরা পাহাড় আছে। তার গায়ে ঞাড়া চ্যাটালো কালো পাথরের চাকড়। অনেকগুলো বড় বড় গুহা। সবে গুঠা একটু চাঁদের আলোয় গরমের শেষ রাতের হাওয়ায় দোলাহুলি করা ডাল-পালার ছায়ায় পাহাড়টাকে ভুতুড়ে ভুতুড়ে লাগছিল।

টিরিদাদা এখানে এসেই আমাদের একেবারে গায়ে গায়ে সঁটে চলতে লাগলো।

টেড বলল, কি হলো টিরিদাদা? ভয় পেও না। আমারও মন বলছে, এখানে ভূত নিশ্চয়ই আছে।

টিরিদাদা প্রচণ্ড রেগে উঠল। এবং সন্দের দু-একজন ওর সঙ্গে তাল মেলাল।

বলল, রাতের বেলায় বনপাহাড়ে ওসব দেবতাদের নিয়ে রসিকতা একেবারেই করতে নেই। ওরা ঐসব দেবতাদের ভালো করেই জানে, তাই ভয় পায়। বন্দুক দিয়ে ত আর

ওঁদের মারা যাবে না ।

টেড চূপ করে গেল ।

হঠাৎ আমাদের সামনের অল্প চাঁদের আলোয় মাখামাখি ভুতুড়ে পাহাড়তলী থেকে একটা আওয়াজ উঠল উ-আউ । পাহাড়ের আনাচ-কানাচ, উপত্যকা সব সেই আওয়াজে গম্‌গম্‌ করে উঠল ।

লোকগুলো সব ঘন হয়ে ঘেঁষাঘেঁষি করে দাঁড়াল আমাদের পেছনে ।

বড়ো সর্দার ফিস্‌ফিস্‌ করে বলল, টাঁড়বাঘোয়া ।

সে বাঘের গলার আওয়াজ এত জোরালো এবং এমন গম্ভীর এবং যার আওয়াজ শুনেই তলপেটের কাছে বাথা বাথা লাগছিল, তাই তার চেহারাটা ঠিক কীরকম হবে তা অনুমান করে আমি মোটেই খুশি হলাম না ।

টেড কিছুক্ষণ অঙ্ককারের মধ্যে যেদিক থেকে শব্দটা এসেছিল সেই দিকে চেয়ে থেকে বিড় বিড় করে কী যেন বলল ।

বাঘটা আরেকবার ডাকল ।

একটু পরই একটা কোটরা হরিণ আর একদল মেয়ে শম্বর জঙ্গলে ডানদিকে দৌড়তে দৌড়তে ডাকতে ডাকতে চলে গেল । তাতে বুঝলাম, বাঘটা আমাদের পথ থেকে অনেক ডানদিকে সরে যাচ্ছে !

মশালগুলো জ্বোর করে নিয়ে ওরা আবার এগোলো । আমি আর টেড রাইফেলের ম্যাগাজিনে গুলি লোড করে নিলাম । উঁচু-নীচু পথে অ্যাকসিডেন্ট হতে পারে চেহারে গুলি

থাকলে, তাই চেস্বার ফাঁকাই রাখলাম। ভাবলাম, বাঘ কী অত সহজে দেখা দেবে আমাদের।

যখন আমরা পলাশবনা গ্রামের সীমানায় কাঁটা-গাছের বেড়া দেওয়া অনেক ক্ষেত-খামার আর জঁটাজুট-সম্বলিত বড় অশথগাছের নিচের বনদেবতার থান পেরিয়ে গ্রামের দিকে এগোতে লাগলাম তখন একজনের বাড়ির উঠানের কাঠের বেড়ায় বসে, গলা-ফুলিয়ে একটা সাদা বড়কা মোরগ কঁকর-কঁ-অহ করে ডেকে উঠে রাত পোহানোর খবর পৌঁছে দিল দিকে দিকে।

পলাশবনাতে পৌঁছতেই খবর পাওয়া গেল যে, টিকায়তে খুবই চটে গেছে গাঁয়ের লোকদের উপরে। সে বাঘ মেরে দেবে বলা সত্ত্বেও তাকে না-বলে-কয়ে তারা যে আমাদের কাছে পৌঁছে গেছে তাতে তার সম্মানে লেগেছিল। টিকায়তে খবর দিয়ে রেখেছিল যে, তার সঙ্গে দেখা না করে যেন আমরা জঙ্গলে না-চুকি। কারণ, এই গ্রামের মালিক সেইই।

এই টিকায়তেরও অন্য সব টিকায়তেরই মত অনেক জমি-জমা, গাই-বলদ, মোষ, প্রজা, লেঠেল ইত্যাদি ছিল। সাধারণ গরীব মানুষদের উপর এদের প্রতিপত্তি ও অত্যাচার ধারা নিজের চোখে না দেখেছেন তারা বিশ্বাসও করতে পারবেন না।

যাইহেঁ হোক, টেড আমার দিকে তাকাল, আমি টেডের দিকে। আগে টিকায়তকেই মারব, না বাঘ মারব ঠিক করে উঠতে পারলাম না আমরা।

টিকায়তে একজন লেঠেল পাঠিয়েছিলো। সাড়ে ছ'ফিট লম্বা সেই পালোয়ান সাত ফিট লম্বা লাঠি হাতে যখন কনল



যে, আমাদের এখন টিকিয়েতের সঙ্গে দেখা করার একেবারেই সময় নেই ; আমরা আগে বুড়ির মৃতদেহের খোঁজেই যাচ্ছি ; তখন খুবই অবাক চোখে আমাদের দিকে তাকিয়ে চলে গেল সে, টিকিয়েতকে আমাদের দুঃসাহসের খবরটা দিতে ।

টিরিদাদার উপর মালপত্রের জিন্মা দিয়ে, বুড়ির ঘর কিংবা অন্ত যে কোনো খোলামেলা একটা ঘর গ্রামের এক প্রান্তে যাতে পাওয়া যায় তার খোঁজ করতে বলে ছুজন স্থানীয় যুবকের সঙ্গে আমরা বেরিয়ে পড়লাম ।

প্রথমেই এলাম কুয়োতলায় । বুড়ির মাটির কলসীটা ভেঙে পড়ে ছিল তখনও । যুবক দুটি বুড়িকে মাটিতে টেনে নিয়ে যাওয়ার দাগ দেখে দেখে এগোতে লাগল । প্রথমে অবশ্য একটুও দাগ ছিল না টেনে নেওয়ার । বুড়ির ঘাড় আব কাঁধ কামড়ে ধরে প্রকাণ্ড বাঘটা প্রায় তাকে শূন্যে তুলেই নিয়ে গেছে অনেকখানি ।

বাঘটা যে কত বড় তা তার পায়ের দাগ দেখেই বোঝা গেল । দশ ফিটের মত হবে বলে মনে হলো আমার ও টেডের । বেশীও হতে পারে । অবশ্য, ওভার দ্ব কার্ভস্ মাপলে । বাঘের পায়ের চিহ্ন দেখে আমারও রীতিমত ভয়ই করতে লাগল । টেডএরও নিশ্চয়ই করছিল । কিন্তু কে যে বেশী ভয় পেয়েছি তা তক্ষুনি বোঝা গেল না । পরে নিশ্চয়ই বোঝা যাবে ।

শাল জঙ্গলের মধ্যে কিছুদূর নিয়ে গিয়েই বুড়ির সাদা থানটাকে খুলে ফেলেছে বাঘ । রক্তমাখা, তখনও সপ্সপে কাপড়টা ওরা তুলে নিল । দেখা গেল, বাঘটা বুড়িকে কতগুলো

পুট্‌স্ আৰ আনাৰসেৰ মত দেখতে মোৰব্বাৰ জঙ্গলেৰ মধো দিয়ে ছেঁচড়ে টেনে নিয়ে গেছে। সেই জায়গাটা পেরিয়ে এক টুকরো হরজাই জঙ্গলে ঢুকে, সেই জঙ্গলও পেরিয়ে একটা কালো পাথরের বড় টিলার পাশে, কতগুলো ঢোঙটা, ঢোটৰ আৰ পলাশ গাছের মধো ঢুকে নীচের পুট্‌স্ আৰ শালের চারার মধো মৃতদেহটাকে লুকিয়ে রেখেছে।

প্রায় সবটাই খেয়ে গেছে। আছে শুধু একটা পা আৰ মাথার খুলি। চুলগুলো ছিঁড়ে ছড়িয়ে আছে এখানে ওখানে। দেখেই আমাদের গা-গোলাতে লাগল। সেইই প্রথম মানুষকে বাঘে-খাওয়া মানুষের মড়ি দেখলাম আমি আৰ টেড।

চারদিক দেখে-টেখে মনে হলো, বাঘ এখন কাছাকাছি নেই। নেই যে তা বোঝা গেল পাখিদের এবং নানা জানোয়ারের ব্যবহারে। কাছাকাছি মাচা বাঁধার মত কোন গাছও দেখলাম না ভাল। পলাশ গাছগুলো ছোট ছোট ছিল, তাছাড়া এই গাছগুলোর নীচের দিকটা গাড়া হয়। গরমের সময় ত পাতাও থাকে না মোটে। শুধুই ফুল। লালে লাল হয়ে আছে চারদিক। ঢোঙটা ও ঢোটৰগুলোও তথৈবচ। তার চেয়ে এই বড় কালো টিলাটাতে বসলে কেমন হয় সে কথা আমি আৰ টেড সেই দিকে চেয়ে চুপ করে ভাবছি, ঠিক সেই সময়ই একটা শব্দ ভয় পেয়ে ডাকতে ডাকতে টিলাটার পিছন দিক দিয়ে বেরিয়ে আমাদের একেবারে পাশ দিয়ে জোরে দৌড়ে চলে গেল খুরে খুরে পাথরের ঠকাঠক্ শব্দ করে।

বাপারটা কি যখন তা বোঝার চেষ্টা করছি তখনই গোটা দশেক জংলী কুকুর টিলাটার পাশ থেকে দৌড়ে বেরিয়েই শব্দটাকে লাফাতে লাফাতে ধাওয়া করে নিয়ে চলে গেল।

‘রাজকোঁয়া, রাজকোঁয়া!’ বলে চোঁচিয়ে উঠল সঙ্গের যুবক দুটি।

টেড ঠোঁটে আঙুল ছুঁইয়ে চুপ করতে বলল ওদের।

তারপর ওদের গাছে উঠে, বসে থাকতে বলে, আমি আর টেড হুজনে হুদিকে চলে গেলাম, টিলাটাকে ভাল করে দেখার জন্তে। রাতে কোথায় বসা যায়, এবং আদৌ বসা যায় কি-না তা খুব সাবধানে খতিয়ে দেখতে হবে আমাদের। সন্ধ্যার পর এই কালো পাথরের টিলার চারপাশে কালো কালো ছায়া পাথরের মতোই চেপে বসবে। কোনোদিকেই কিছু দেখা যাবে না। এবং বাঘ যদি আসে তবে শুধু শব্দ শুনেই তার গতিবিধি ঠিক করতে হবে। জায়গাটা এমন যে, চাঁদ উঠলেও ছায়ারা দলে আরো ভারী হবে।

আমরা হুজনে টিলার হুদিকে এগিয়ে যাচ্ছিলাম। সাবধানে। রাইফেলের সেফটি-কাচে আঙুল রেখে। এখন আর একে অঙ্কে দেখা যাচ্ছে না। কতগুলো ছাতার পাখি ডাকছে। উড়ছে। বসছে। বুড়ির দুর্গন্ধ শরীরেও একরাশ পোকা উড়ছে বসছে। একঝাঁক টিয়া হঠাৎ কাঁচ কাঁচ করে ডাকতে ডাকতে মাথার উপর দিয়ে উড়ে গেল গ্রীষ্ম-সকালের শাস্ত সমাহিত ভাবটা একেবারে ছিঁড়ে-খুঁড়ে দিয়ে।

আমি আস্তে আস্তে উঠতে লাগলাম টিলাটার উপরে।

টেডকে আমি দেখতে পাচ্ছি না। ও নিশ্চয়ই অগ্নি দিক দিয়ে উঠেছে। টিলাটার উপরে একটা গুহা। এবং সেই গুহার ঠিক সামনে পাথরের উপর বাঘের নয়লা পড়ে আছে দেখতে পেলাম। খুব বেশী পুরোনো নয়। তিন চার দিনের হতে পারে, বেশী হলে।


তবে কি টাঁড়বাঘোয়া এখন এই গুহার মধ্যেই বিশ্রাম নিচ্ছে?

গুহার মুখে একটুও ধুলো বালি নেই যে, বাঘের পায়ের দাগ পড়েছে কিনা তা দেখব! রাইফেলটা লুক করে সেফটিক্যাচটা তুলে রাখলাম। প্রয়োজন হলে মুহূর্তের মধ্যে যাতে সেফটিক্যাচকে হেলে সরানো যেতে পারে।

গুহার মুখের একপাশে দাঁড়িয়ে ভাবছি, গুহার মধ্যে ঢোকা ঠিক হবে কি হবে না; হঠাৎ এমন সময় মনে হলো আমার পিছন থেকে কে যেন আমাকে এক-দৃষ্টিতে দেখছে। প্রত্যেক শিকারীই জানেন যে, বনে-জঙ্গলে এরকম মনে হয়। একেই হয়ত বলে শিকারীদের সিক্সথ-সেল্। মনে হতেই, ঘুরে দাঁড়ালাম আমি রাইফেলসুদ্ধ।

ঘুরে দাঁড়ালাম বুটে কিন্তু দেবী হয়ে গেল।

হয়ত আমাদের ছুজনেরই। একটা প্রকাণ্ড হলুদ-রঙা বাঘের দাড়ি-গোঁফওয়ালা মুখ মুহূর্তের জন্তে গোল কালো পাথরের উপর দেখা দিয়েই অদৃশ্য হয়ে গেল। আমি পাথর টপ্কিয়ে টপ্কিয়ে ঐদিকে এগোতে লাগলাম টিলাটাকে ঘুরে ঘুরে। বাঘটা যেখানে ছিল সেখান থেকে একলাফেই আমার ঘাড়ে পড়তে পারত। কিন্তু আমি যেখানে ছিলাম সেখান



থেকে বাঘের কাছে পৌঁছতে হলে অনেকখানি ঘুরেই যেতে হবে অনেকগুলো পাথর ডিঙ্গিয়ে ও গহ্বর এড়িয়ে ।

হঠাৎই আমার টেডএর কথা মনে হলো ।

আমি শিকারের আইন ভেঙ্গে চেষ্টা করে বললাম, টেড, ওয়াচ-আউট । দু'মানইটার ইঞ্জ এয়ারাও ।

টেড সংক্ষিপ্ত উত্তর দিলো দূর থেকে, আই নো ।

যখন বাঘটার জায়গায় গিয়ে পৌঁছেছি রাইফেল বাগিয়ে, তখন টিলার পশ্চিমদিকের কাঁটা জঙ্গলের মধ্যে মধ্যে একটা ভারী জানোয়ারের দ্রুত চলে যাওয়ার আওয়াজ শোনা গেল ঝরে-পড়া শুকনো পাতা মচমচিয়ে ।

সেইদিকে চেয়ে আওয়াজটা লক্ষ্য করতে লাগলাম । দূরে যেতে যেতে আওয়াজটা একটা ছায়াচ্ছন্ন পাহাড়ী নালায় মধ্যে গিয়ে মিলিয়ে গেল ।

আমি নেমে এলাম সাবধানে টিলা থেকে । গাছে-বসা একটা লোককে জিগগেস করলাম, টিলার উপর থেকে গুহার মুখটি সে দেখতে পাচ্ছে কী না ?

সে বলল, পাচ্ছে ।

আমি বললাম, গুহার ঐ মুখটার দিকে নজর রাখতে । কিছু দেখলেই যেন চেষ্টা করে আমাকে বলে ।

ও বলল, আচ্ছা ।

নেমে দেখি, টেড খুব মনোযোগ দিয়ে মাটিতে কী যেন দেখছে ।

আমি যেতেই, আমাকে দেখাল । টিলার নিচে, মাটিতে এক জোড়া বাঘের পায়ের দাগ । টাঁড়াঘোয়ার দাগ এবং

একটি বাঘিনীর পায়ের দাগ। বাঘিনী টাঁড়াঘোয়ার চেয়ে ছোট।

এরপর আমরা দুজনে সাবধানে টিলাটার চারদিকে একবার ঘুরলাম আরও দাগ আছে কিনা দেখার জন্তে। টিলার পশ্চিম দিকে, যোঁদিকে আওয়াজটা মিলিয়ে যেতে শুনেছিলাম একটু আগে, সেই দিকে মাটিতে অনেক পায়ের দাগ দেখলাম বাঘ ও বাঘিনীর। তিন-চারদিন আগে বৃষ্টি হয়েছিল, নরম মাটিতে দাগগুলো স্পষ্ট।

আমরা মহা সমস্যায় পড়লাম।

ফিরে এলাম আবার বুড়ির দেহ যেখানে পড়েছিল সেখানে। যে-লোকটা গুহার মুখে পাহারা দিচ্ছিল তাকে বসিয়ে রেখে, গাছের অগ্নি লোকটাকে নেমে আসতে বলল টেড।

সে নামলে, তাকে দ্বিতীয় বাঘের কথা জিজ্ঞেস করল ও।

ওরা ত আকাশ থেকে পড়ল। গ্রামের যত লোক নানান কাজে প্রত্যেকদিন জঙ্গলে আসছে তাদের মধ্যে কেউই এক টাঁড়াঘোয়া ছাড়া অন্য কোনো বাঘকে দেখেনি। পায়ের দাগও দেখেনি। এই গ্রামে আশে-পাশে কখনও কোনো চিতাবাঘও দেখেনি ওরা। হয়ত তার কারণ টাঁড়াঘোয়াই। তার মত পাহারাদার থাকতে কোনো চিতাবাঘেরই এখানে এসে ওস্তাদী করার সাহস হয়নি।

ইতিমধ্যে চারজন লোক হৈ হৈ করতে করতে দড়ি আর একটা চৌপাই মাথায় করে এসে হাজির। তারা বলল যে,

তারা টিকিয়েতের লোক । টিকিয়েত রাতে এখানে মাচা করে বসবে, তাই মাচা বাঁধতে পাঠিয়েছে ।

তারপর আমাদের দিকে ফিরে বলল, আপনারা কিন্তু বাঘের গায়ে গুলি-টুলি করবেন না । করম্চারীয়া আপনাদের খুঁজছে । আপনাদের খুবই বিপদ হবে টিকিয়েতের কথা না শুনলে ।

করম্চারীয়া, জানা কথা, টিকিয়েতেরই লোক । কিন্তু সে আমাদের খুঁজলেই ত আমরা যাব না তার কাছে ।

টেড বলল, টিকিয়েতের পোষা বাঁদর নই আমরা ।

আমাদের সঙ্গেই যুবক দুটি টেডএর কথাতে হেসে উঠল ।

তাতে টিকিয়েতের লোকগুলো আরো চটে গেল ।

গাছের উপর থেকে অল্প লোকটিও নিচে নেমে এলে আমি টিকিয়েতের লোকদের বললাম, মাচা কোথায় বাঁধবে ?

ওরা বলল, যে গাছে সুবিধে মত বাঁধা যায় ।

কিন্তু টিকিয়েতকে গিয়ে বল যে, এখানে ছ' ছুটো বাঘ আছে । একনলা শট্‌গান নিয়ে তার পক্ষে এই ছ' ছুটি বাঘের মোকাবিলা করা কি সম্ভব হবে ? তার প্রাণের ভয় নেই ?

টেড বলল, টিকিয়েতকে গিয়ে বলো, আমরা সকলে মিলেই একসঙ্গে বাঘ দুটি মারার চেষ্টা করি ।

ওরা ভাবল, ঠাট্টা করছি ।

তখন টেড তাদের নিয়ে গিয়ে পায়ের দাগ দেখালো ভালো করে, বুঝিয়ে দিল ব্যাপারটা কী !

ছুটো বাঘের পায়ের দাগ দেখে লোকগুলো ফ্যাসাদে পড়ল । তারপর রাইফেল-হাতে আমরা ঐ জায়গা ছেড়ে চলে

যাচ্ছি দেখে ওরাও বোধহয় খালি হাতে ঐ অকুস্থলে থাকা নিরাপদ নয় ভাবলো ।

আমরা একটু এগোতেই দেখি উপুড়-করা খাটিয়া মাথার উপর নিয়ে পিছন পিছন আসছে পুরো দল বড় বড় পা-ফেলে ।

টেড বলল, চল্ আমরা ফিরে যাই । এখানে দেখছি টিকায়তকেই আগে মারতে হবে, তারপর বাঘ মারার বন্দোবস্ত । এতরকম কমপ্লিকেশান, এত জনের এত মত নিয়ে মানুষথেকো বাঘ মারা যায় না ।

আমি বললাম, যা বলেছি ।

গ্রাম থেকে আমরা প্রায় মাইলখানেক এসেছিলাম । বাড়ির ঘরে নয় । গ্রামের দক্ষিণ প্রান্তে আমাদের জন্তো ছুটি ঘর ছেড়ে দিয়েছে ওরা ! গোবর দিয়ে উঠোন লেপে দিয়েছে । ঘরের ভিতরও পরিষ্কার পরিচ্ছন্ন করেছে । কিন্তু গরমের মধ্যে জানালাহীন ঐ ঘরে কী করে শোব রাতে তাইই ভাবছিলাম ।

টিরিদাদা চা করে ব্রেকফাস্ট তৈরী করে ফেলল, আমাদের দেখেই ।

মুড়ি ভাজা । তার মধ্যে কাঁচা পেয়াজ কাঁচা লস্কাকটে মুড়ির সঙ্গেই ভেজেছে । তারপর তার মধ্যে ওমলেট কেটে টুকরো টুকরো করে দিয়ে দিয়েছে । গ্রামের গাছের ল্যাংড়া আম । আর কফি ।

ঘর দুটোর পাশে একটা মস্ত তেঁতুলগাছ ছিল । তার তলায় চৌপাই বিছিয়ে আমি লস্কা হয়ে শুলাম । আর

সাহেব মানুষ টেড, ঘটিতে জ্বল নিয়ে ফসা-ফর্সা ঠাং বের করে
লাল গামছা পরে জ্বলে গেল। যারা জ্বলে বাওয়া-আসা
করে প্রত্যেকেরই অভ্যাস থাকে।

তঁতুলতলার ফুরফুরে হাওয়াতে আমি ঘুমিয়েই পড়েছিলাম।
এমন সময় হঠাৎ শোরগোল শুনে তাকিয়ে দেখি ভাগলপুরী
সিন্ধের পাঞ্জাবী আর লোম-ওয়ালা গোবদা গোবদা
পা-দেখানো মিলের ফিন্ফিনে ধুতি পরা, সোনার হাত-ঘড়ি
হাতে, চক্কে কালো নাগরা পায়ে একজন মস্ত লখা-চওড়া
লোক একটা সাদা ঘোড়ায় চড়ে এদিকে আসছে আর তার
পিছনে কুড়ি-পঁচিশজন লাঠিধারী ষণ্ডা-মার্কী লোক।

আমি আরামের ঘুম ছেড়ে তাড়াতাড়ি চৌপাইতে উঠে
বসলাম।

ঠিক আমার সামনে এসে লোকটি দাঁড়িয়ে পড়ে ধমক দিয়ে
শুধোলো, আপ্কাঁ শুভ্ নাম ?

আমি নাম বললাম। সবিনয়ে।

টিকায়েত বলল, তাঁর এলাকাতে এসব তিনি সহ্য করবেন
না। এই পলাশবনা গ্রামে সব কিছু তাঁর ইচ্ছামতই হয়েছে
এযাবৎ এবং হবে চিরদিন।

ভাবছিলাম, এতবড় একটা বিপদ! কোনদিন বাঘ কাকে
নেয় তার ঠিক নেই। তারপর আজ দেখা গেল জোড়া বাঘ।
গ্রামের গরীব লোকগুলো এতদূর থেকে আমাদের ডেকে নিয়ে
এলো আর যে গ্রামের মালিক, মাথা, তারই কী না এই
ব্যবহার ?

লোকটার দিকে অবাক চোখে চেয়ে আমি বসেছিলাম।

এমন লোককে কিছুই বলার নেই।

এমন সময় টেডকে আসতে দেখা গেল।

টিকায়ের মুখ দেখে মনে হলো, এমন সাহেব টিকায়ের বাপের জন্মেও দেখিনি। টকটকে গায়ের রঙ, মাথাভরা বাদামী চুল, খালি গা, পায়ে চটি, লাল গামছা পরে সাহেব ঘটি হাতে টাঁড় থেকে প্রাতঃকৃত্য শেষ করে আসছে।

টেড এসেই বলল, এখানে ভীড় কিসের ?

তখনও ত দেশ স্বাধীন হয়নি। সাদা চামড়া দেখলেই লোকে বেশ সমীহ করত। কিন্তু এই রকম গামছা-পরা সাহেবকে সমীহ করা ঠিক হবে কী না, একটু ভাবল টিকায়ের। তারপর নিজের লোকদের সামনে ইজ্জৎ বাঁচাবার জন্তে বলল, আপনাদের এখান থেকে চলে যেতে হবে।

টেড বলল, সে কথা ভেবে দেখব। কিন্তু এখুনি আপনার একজন লোক দিন আমাকে। আমি এস-ডি-ও সাহেবের কাছে চিঠি পাঠাবো, ডিস্ট্রিক্ট মাজিস্ট্রেটকে দিয়ে এই বাঘকে 'মান-ইটার' ডিক্লেয়ার করার জন্তে এবং চার পাশের সব গ্রামের মানুষদের টেঁড়া পিটিয়ে সাবধান করে দেওয়ার জন্তে।

টিকায়ের, টেডএর হর্তাকর্তার মত কথা শুনে হকচকিয়ে গেল বলে মনে হল।

আমি বললাম, ঘোড়া থেকে নামা হোক। আপনার রাজ্জে এলাম, আপনাদেরই উপকার করার জন্তে, তা আপনিই শত্রুর মত ব্যবহার করছেন !

তারপর বললাম, দয়া করে নামুন, বাঘটার খবরাখবর দিন আমাদের। বাঘও ত আপনার প্রজা। আপনি তার খোঁজ না রাখলে, আর কে রাখবে ?

টিকায়ত ঘোড়া থেকে নামল।

আমি বললাম, আপনার বন্দুকটা কোথায় ? শুনেছি দারুণ দামী বিলিতি বন্দুক। আমাদের একবার দেখান। নেড়ে-চেড়ে দেখি অন্ততঃ একটু।

টেড আমার দিকে অবাক হয়ে তাকিয়ে থাকল। তারপর ইংরিজীতে বলল, কী ব্যাপার ? অত গ্যাস দিচ্ছি কেন ?

আমিও ইংরিজীতে বললাম, মিষ্টি কথা বলতে ত পয়সা লাগে না। ছাখ-না, ঠুকে বন্ধু করে ফেলছি।

টেড বলল, যেমন তুই ! তোর বন্ধুও ত তেমনই হবে !

টেড জামাকাপড় পরে আসতে গেল।

টিকায়ত এসে চোপাইতে বসল।

লোকটার বয়স আমাদের চেয়ে অনেক বেশী। চল্লিশ-টল্লিশ হবে। শুনলাম, তার এগারোটা ছেলে-মেয়ে, পাঁচশ বিঘা জমি, দেড়শো গরু-মোব। জঙ্গলের মধ্যে ভাণ্ডার। বিহারের গ্রামে-জঙ্গলে ক্ষেত-খামার দেখাশোনার জন্তো মাটির বাড়ি করে এরা, তার মধ্যে গুদামটুদামও থাকে। ওরা বলে ভাণ্ডার।

টিকায়ত একটা লোককে ডেকে কী বলল। সে আরো হুজুক সঙ্গ করে দৌড়ে চলে গেল।

আমি টিরিদাদাকে বললাম, চা করে খাওয়াও

টিকায়ত্ত সাহেবকে ।

ইতিমধ্যে টেড জামা-কাপড় পরে এলো । এবার ওকে পুরোদস্তুর সাহেব-সাহেব দেখাতে লাগল । টিকায়ত্তের ভক্তিতে পুরো হল । হাব-ভাবও একটু নরম হলো ।

বলল, আপনারা এই ঘরে কী থাকবেন ? আমার বাড়ি চলুন নয়ত ভাণ্ডারে বন্দোবস্ত করে দিচ্ছি । খাঁটি গাওয়া ঘি-এর পরোটা, হরিণের মাংসের আচার, ক্ষেতের ছোলার ডাল, আর তার সঙ্গে খরগোশের এবং শস্যের মাংস খাওয়াব ।

তারপর বলল, নীলগাই এখানে এত যে, ক্ষেত-খামারই করা যায় না । আমরা যে হিন্দু, তাই নীলগাই আমরা মারি না । গো-হত্যা হবে ।

ওদের পুথিয়ে লাভ নেই যে, নীল গাইএর নামই নীল গাই, কিন্তু তারা মোটেই গরু নয় । একরকমের এণ্টেলোপ । এবং এরাই এবং বাঁদর-হনুমানই সবচেয়ে ক্ষতি করে ফসলের । কিন্তু গ্রামের লোকের কুসংস্কারের জগে নীলগাই আর বাঁদর হনুমান মারে না আমাদের দেশে । নীলগাইকে খুব একটা মজার নামে ডাকে এরা । বলে, ঘোড়ফরাস্ । নামটা শুনলেই আমার বুক ধড়ফরাস্ ।

টিরিদাদা চা আর হাটলি-পামারের বিস্কিট এনে দিল টিকায়ত্তকে । টিকায়ত্ত যখন শ্রীত হয়ে চা খাচ্ছে, তখন যে লোকগুলো চলে গেছিল তারা এক গাদা মাঠরী আর পাঁজা নিয়ে এলো । নিশ্চয়ই টিকায়ত্তের বাড়ি থেকে ।

টিকায়ত্ত বলল, খেয়ে দেখুন । সব বাড়ির তৈরী । অসুখ হবার ভয় নেই । মাঠরী খাঁটি ঘি-এ এবং বাড়ির জামতায়-পেয়া

ময়দা দিয়ে তৈরী ।

টিকায়ের ভুঁড়ির দিকে তাকিয়ে বুঝতেই পারছিলাম যে, ঘি সতাই খুব খাঁটি । চা খেতে খেতে টিকায়েরকে বললাম, তাহলে বাঘটাকে কী করা যাবে ?

টিকায়ের বলল, চলন না আমরা তিনজনেই বসি আজ । শুনলাম যে, টিলা আছে ওখানে একটা । ঐ টিলাতেই তিনজনে তিন জায়গায় বসে থাকব ।

টেড আমাকে ইংরিজীতে বলল, তুই যাত্রাপাটিতে কবে নাম লেখালি ? মান-ইটার মারতে তাহলে সঙ্গে তবল্‌চী, সারেক্সীওয়ালাকেও নিয়ে যা !

আমি টিকায়েরকে বললাম, ঐ টিলাতে বসা খুবই বিপজ্জনক । টাঁদ নেই এখন । আর বাঘ ত অমনি বাঘ নয় ; মানুষখেকো । কখন যে নিঃশব্দে এসে কাঁকু করে ঘাড় কামড়ে নিয়ে যাবে বোঝার আগেই, তারও ঠিক নেই । তাতে আবার ছুটি ।

টিকায়েরের মুখে এক তাজিলোর হাসি ফুটে উঠল । বলল, আপনারা তাহলে খুব বাঘ মারবেন । বাঘ মারতে সাহস লাগে ।

বলেই, তাজিলোর চোখে তাকিয়ে আবার বলল, ইয়ে বাচ্চোঁকা কাম নেহী ।

আমি বললাম, তা লাগে । কিন্তু গৌয়াতুঁমি আর সাহস এক কথা নয় । মানুষখেকো বাঘ মারতে বোকা-বোকা সাহসের চেয়ে বুদ্ধি আর ধৈর্য অনেক বেশী লাগে ।

টিকায়ের বিক্রপের হাসি হেসে বলল, যা বোঝার তা

বুঝেছি। আপনাদের মত বাচ্চা ছেলেদের কর্ম নয় এই বাঘ
মারা।

তারপরই বলল, বাজীই লাগান একটা তাহলে।

আমার খুব রাগ হল আমাদের বাচ্চা বলাতে।

টেড বলল, বাজী কিসের?

বাঘ কে মারবে? বাঘ মারার বাজী।

আমি বললাম, বাঘ মরলেই হল। কে মারে সেটা
অবাস্তব।

টিকিয়েত আবার বলল, বুঝেছি। ভয় পেয়ে পেছিয়ে
যাচ্ছেন।

তারপর আবার বলল, বলুন কি বাজী? সাহস আছে?
কি হল? বাজী ধরারও সাহস নেই?

টেড হঠাৎ বলল, বাজী একটা রাখা যাক। কিন্তু অল্প
বাজী। বাঘ আগে আপনাকে খাবে, না আমাদের খাবে?
আমাদের ত এখানে কেউই নেই। আমার বন্ধুকে খেলে
তাকে ভালোভাবে সৎকার করবেন। আর আমাকে খেলে,
জঙ্গলের মধ্যে একটা সুন্দর ফুল গাছের নিচে ছায়াওয়ালা
জায়গায় কবর দেবেন।

তারপর একটু চুপ করে থেকে লোকজনদের দিকে তাকিয়ে
গলা চড়িয়ে বলল, আর আপনি মবলে, আমরা দাঁড়িয়ে
থেকে আপনাকে দাহ করার বন্দোবস্ত করব। নদীর পারে।

টিকিয়েত বেজায় চটল। বলল, বুঝেছি।

টেড আবার বলল, কি হল? বাজীর?

টিকিয়েত বলল, আপনাদের বাজীর মধ্যে আমি নেই।

আমি একাই বসব আজ বাঘের জঙ্গে ।

আমি বললাম, বসেনই যদি, তাহলে টিলায় বসবেন না,
আমার অনুরোধ ।

ভেবে দেখবো ।

টেড বলল, একজন লোক দিন, যাতে দিনে দিনে এস-
ডি-ওর কাছে যেতে পারে । এস-ডি-ও আবার ডি-এমকে
জানাবেন তবে ত মান-ইটার ডিক্লেয়ার করতে পারবেন ।

লোকের কী অভাব ? লোক দিয়ে দিচ্ছি দেড়-বোঝা ।
আপনি চিঠি লিখে দিন ।

টিকায়ত্ত বলল ।

টেড টিরিদাদাকে কাগজ আনতে বলল ।

টিরিদাদা কাগজ আনলে চিঠি লিখে নিজে সই করল,
আমাকেও সই করতে বলল । টিকায়ত্তকে বলল সই করতে
গ্রামের লোকদের হয়ে ।

টিকায়ত্ত লেখাপড়া জানে না । ডানহাতের ইয়া মোটকা
বুড়ো আঙ্গুলে কালি লাগিয়ে টিপসই দিলে সে ।

তারপরেই উঠে পড়ে বলল, আমি যাই । মাটা বাঁধার
বন্দোবস্ত করি গিয়ে ।

টেড বলল, তা যান । আমরা আজ খুব ঘুমোব । কাল
আপনাকে দাহ করতে অনেক মেহনত হবে ত ! যা ঘি
আছে আপনার শরীরে । পুড়তে অনেক সময় লাগবে ।

টিকায়ত্ত হাসি হাসি মুখে বলল, চলি ।

বলেই, ঘোড়ার দিকে এগোতে গেল ।

টেড বলল, একটু দাঁড়ান । আপনিই ত গত বছরে

বাঘটাকে গুলি করেছিলেন। কোথায় লেগেছিল গুলি ? আপনি কী জানতেন না যে, গরমে যখন পিপাসার্ত জানোয়াররা জল খেতে আসে তখন তাদের ঐভাবে মারা বে-আইনী ?

টিকিয়েত হেসে বলল, জঙ্গলে আবার আইন কি ? আমার এখানে আইন আমি বানাই। আমি যা করি, তাইই আইন। আমারই আইন, আমি ইচ্ছেমতই ভাঙতে পারি। তাব জগ্গে কারো কাছে জবাবদিহি করতে রাজী নই। সে রকম বাপের ব্যাটা নই আমি। জান্ভি যায়গা তব্ভি নেহী ! কভ্ভি নেহী।

তা ভাল। টেড বলল, কিন্তু বাঘটাকে আহত করে আপনিই ত বুড়ি আর মেয়েটির মৃত্যুর জগ্গে দায়ী হলেন। আপনাকে আপনার প্রজারা খুনের দায়ে দায়ী করতে পারে। করছেও হয়ত মনে মনে।

টিকিয়েত কোমবে হাত দিয়ে দাঁড়াল। তাক্ষিলেঃ হাঙ্গি হেসে বলল, দেখুন, আপনাদের সঙ্গে ফাল্তু কথা বলার সময় আমার নেই। আমার রাজ্বে আপনারা অতিথি, তাই ভাল ব্যবহার করছি। আমি দিগা টিকিয়েতের বেটা। আমার বাবা ডাকাত ছিল। তার ভয়ে বাঘে-গকতে এক ঘাটে জল খেতো। আমাকে আপনারা ভয় দেখাবেন না। আমার রক্ত ভয় কাকে বলে তা জানে না। এই জঙ্গলের আমিই রাজা। আপনারা হয়ত বুঝতে পারবেন না আমার কথা, কি আমি বলতে চাচ্ছি। কিন্তু শুধু এই কারণেই বাঘটাকে আমারই মারতে হবে। নইলে আমার ইচ্ছা



ANITA

থাকবে না ।

একটু চূপ করে থেকে টিকিয়েত আবার বলল, এই টাঁড়বাঘোয়া যতদিন প্রজার মত আমার রাজত্ব ছিল, ওকে কিছুই বলিনি । গত বছরে আমার একটা ঘোড়া খেয়েছিল, তাইই ভেবেছিলাম শাস্তি দেওয়া দরকার । এবার আমার ছুজন প্রজাকে ও মেরেছে !

একটু চূপ করে থেকে বলল, সমঝা না, এক জঙ্গলে ছুজন রাজা থাকতে পারে না । হয় আমি থাকব ; নয় টাঁড়বাঘোয়া থাকবে । আপনাদের সঙ্গে আমার কোনো ঝগড়া নেই । দয়া করে আমার কথাটা বুঝুন । এটা আমার সম্মানের ব্যাপার । আমাকে আগে চেষ্টা করতে দিন । আমি না পারলে বা আপনাদের অহুমতি দিলে তখনই আপনারা মারবেন ।

টেড বলল, তা হয় না । আমাদেরও একটা দায়িত্ব আছে । প্রথমত একনলা বন্দুক দিয়ে অতবড় বাঘকে আপনার মারতে যাওয়াটাই বোকামি । দ্বিতীয়তঃ গ্রামের লোকরা আমাদের ডেকে এনেছে—তাদের এতবড় বিপদের মধ্যে ফেলে আমরা চলে ত আর যেতে পারি না ।

টিকিয়েত বলল, বাঘ কি কেউ শুধুই বন্দুক দিয়ে মারে ? আমার বন্দুকের গুলির সঙ্গে আমার টিকিয়েতের রক্ত, আমার রাগ, আমার ঘেন্না, সব কিছুই ত গিয়ে লাগবে টাঁড়বাঘোয়ার গায়ে । সে যত বড় বাঘই হোক না, আমার চোখে চোখ রাখতে পারবে ? পারে কোনো প্রজা রাজার চোখে চোখ রাখতে ? আমার কাছে এলেই ও ভয়েই মারা যাবে । সামনাসামনি এলে হয় একবার ।

আমরা টিকায়ত্তের কথা শুনে অবাক হয়ে যাচ্ছিলাম।
অদ্ভুত মানুষ। এরকম মানুষ আমরা কেউই দেখিনি আগে।
পড়িওনি কোনো বইয়ে।

টেড বলল, তাইই যদি হবে, তাহলে গত বছর আপনার
গুলি খেয়ে ও বেঁচে গেল কি করে? এমন গুলিখোর বাঘকে
প্রজ্ঞা বানালেনই বা কেন?

টিকায়ত্ত মাথা নিচু করে চুপ করে থাকল।

তারপর বলল, ও আমাকে দেখতে পায়নি। আমিও
ওকে দেখতে পাইনি। সেদিন আমার ছোটছেলের জন্মদিন
ছিল। বাড়ির লোককে কোটরা হরিণের মাংস খাওয়াব কথা
দিয়ে জলের কাছে গিয়ে বসেছিলাম। বেলা পড়ে এসেছিল।
প্রচণ্ড গরমে, ক্লাস্তিতে, ঘুম ঘুম এসে গেছিল। হঠাৎ দেখি,
জলের পাশের পুটস ঝোপের আড়ালে কোটরা হরিণের মত
লালচে কী একটা জানোয়ার এসে দাঁড়িয়েছে। কখন যে
এল জানোয়ারটা তা বুঝতেই পারিনি। হরিণই হবে ভেবে
গুলি করে দিয়েছিলাম বন্দুক তুলেই। গুলি করতেই বিকট
চিৎকার করে এক বিরাট লাফ দিয়ে যখন সে চলে গেল, তখন
দেখি টাঁড়াবাঘোয়া।

কোথায় গুলি লেগেছিল?

জানি না। বোধহয় পায়ের খাবা-টাবাত্তে।

কি গুলি দিয়ে মেরেছিলেন?

তখন আমার বিলিতি বন্দুক ছিলো না। মুঞ্জেরি গাদা
বন্দুক তিন-আঙুল বারুদ কষে গেদে সামনে সীসার গুলি
পুরে ঠুকে দিয়েছিলাম।

আমি বললাম, আপনি একটু আগেই বললেন যে, টাঁড়বাঘোয়াকে আপনার ঘোড়া খাওয়ার জন্তু শাস্তি দিতে গেছিলেন।

আমার ঘোড়া এবং বস্তীর ধোপার গাধা। ওরা সকলেই আমার প্রজা। তাই আমারই হল। শাস্তি দেওয়ার ইচ্ছা ছিল। কিন্তু বাঘ ভেবে ত আর গুলি করিনি। কোটরা ভেবেই করেছিলাম। অত কাছ থেকে গুলি লাগলে কোটরা চিংপাত হয়ে পড়ে যেতাই। বাঘ জানলে, ভালো করে নিশানা নিয়ে মোক্ষম জায়গাতেই মারতাম। তাহলে ওখানেই তাকে শুয়ে থাকতে হতো। তখন আমার রাশিচক্রের একটু গোলমাল চলছিল। এখন তা কেটে গেছে।

বলেই বলল, এই দেখুন, একটা মাতুলী ধারণ করেছি, বলেই, পাঞ্জাবীর ভিতর থেকে সোনার হারে বাঁধা পেলায় একটা মাতুলী দেখাল।

টেড বলল, আমাদের শুভ কামনা রইল। কিন্তু আপনি তাহলে তিনদিন সময় নিন। তিনদিনের মধ্যে রাজায় রাজায় যুদ্ধ শেষ না হলে আমরা এই উলুখাগড়ারাও কিন্তু নেমে পড়ব যুদ্ধে। আপনার কথাটা আমরা বুঝেছি, বোঝবার চেষ্টা করছি বলেই, এই কথা বলছি। এবং আগে আপনাকে সুযোগ দিচ্ছি। আপনার বাঘ আপনিই মারুন।

টিকায়েত এতক্ষণে হাসলো।

তারপর একটু চুপ করে থেকে বলল, বজ্রবলী আপনাদের ভালো করুন। আমি জানতাম, আমার কথা আপনারা বুঝবেন। আপনাদের বহত্ মেহেরবানী। জয়

বজ্ররঙ্গবলীকা জয় !

এই বলে ত ঘোড়ায় গিয়ে উঠল টিকায়তে। বিরাট সাদা ঘোড়াটার ঘাড়ের কেশর ফুলে উঠেছিল। সেই ঘোড়ার উপর এই পলাশবনা গ্রামের টিকায়তেকে রোদে সতি সত্বাই একজন রাজার মতই দেখাচ্ছিল।

ঘোড়ার লাগাম টেনে টিকায়তে বলল, আপনারা কিন্তু আমার অতিথি। খাওয়া-দাওয়া, সব আমারই দায়িত্ব। এখানে আপনারা রান্না করে খেলে আমি খুবই দুঃখ পাব। রান্না যদি একান্ত করেনই, তবু রসদ কিন্তু সব আমিই পাঠিয়ে দেব। এইটুকু নিশ্চয় করতে দেবেন আমাকে।

জ্বাবে আমাদের কিছু বলার সুযোগ না-দিয়েই টিকায়তে ঘোড়া ছুটিয়ে চলে গেলো সেই টিলার দিকে, যেখানে বৃড়ি পড়ে রয়েছে।

আমি বললাম, রাজা-রাজড়ার বাপারই বটে। ঘোড়ায় চড়ে, শোভাযাত্রা করে কেউ মানুষকে বাঘ মারতে যায় শুনেছিস কখনও টেড ?

রোদের মধ্যে লাল ধুলো উড়িয়ে ছল্কি-চালে-চলা সাদা ঘোড়ার পিঠে বসা টিকায়তে জঙ্গলের আড়ালে অদৃশ্য হয়ে গেল।

টেড সেই দিকেই তাকিয়ে ছিল। অনেকক্ষণ তাকিয়ে হঠাৎ বলল, খুব ইন্টারেস্টিং কিন্তু মানুষটা।

আমি বললাম, ভীষণ দাস্তিক। এত গর্ব ভালো নয়।

টেড বলল, আমি তোর সঙ্গে একমত নই। গর্ব না থাকলে কী নিয়ে মানুষ বাঁচে। গর্বর মধ্যে দোষ নেই।

কিন্তু টিকায়ত্তের গর্বর কারণটার মধ্যে কোনো গুণও নেই। এই গর্ব ভালো কারণে, ভালো কাজের জন্তে হলে আরও ভালো হতো।

তারপর একটু চুপ করে থেকে বলল, জানিস, আমার মনে হয়, গর্ব ব্যাপারটার নিজেরও আলাদা একটা গুণ আছে। একটা বেগও আছে। যার গর্ব আছে, তার দায়িত্ব অনেক, সেই গর্বকে বাঁচিয়ে রাখার। আর এই বাঁচিয়ে রাখার চেষ্টা করতে করতেই এ সব মানুষ অনেক কিছু করে ফেলতে পারে। তাই না? দেখিস, মানুষটার এমন জেদ, ঠিক বাঘটা মেরেই দেবে। আমাদের কপালে আর মানুষথেকে মারা হলো না। মিছিমিছিই এলাম এতদূর তল্লি-তল্লা নিয়ে।

টিরিদাদা চায়ের কাপ তুলে নিতে এসেছিল, হঠাৎ গম্ভীর গলায় বলল, বাঘে খাবে ওকে। বাঘে খাবে।

টেড ধমক দিল, কেন বাজে কথা বলছো টিরিদাদা?

টিরিদাদা বলল, বাজে কথা নয়। ও যখন কথা বলছিল, আমি তখন যমদূতকে দাঁড়িয়ে থাকতে দেখেছি ওর একেবারে পিছনে। ওর আয়ু শেষ।

আমি রেগে গিয়ে বললাম, যন্তু সব বাজে কুসংস্কার তোমার টিরিদাদা।

টিরিদাদা অভিমানের গলায় বলল, আরে! আমি দেখলাম যে নিজের চোখে।

তারপর গলা নামিয়ে বলল, টিকায়ত্ত হচ্ছে দিগা-টিকায়ত্তের বেটা আর আমি হচ্ছি মিরি-পাহানের বেটা। আমিও সব দেখতে পাই। সত্যিই দেখেছি যমদূতকে।

বিশ্বাস করে।

টিরিদাদার কথা যেন শোনেইনি এমনভাবে অস্বমনস্ক গলায়
টেড দূরে তাকিয়ে হঠাৎই বলল, তোদের দেশে এইরকম
গবিত, উদ্ধৃত সব মানুষ থাকতেও ব্রিটিশরা তোদের পরাধীন
করে রাখল যে কী করে এতবছর তা ভাবলেও অবাক
লাগে।

টিকায়েত একটা শিশু গাছে মাচা বেঁধে বড়ির মৃতদেহের কাছে বসেছিলো গিয়ে। তবে, গাছটা থেকে মড়িটা বেশ দূরে।

যে-লোকরা টিকায়েতকে মাচায় চড়িয়ে ফিরে এসেছিল বিকেল বিকেল তাদের মুখেই শুনলাম যে, টিকায়েত মড়ির উপরে বাঘকে মারবার আশা রাখে না। মড়িতে যাওয়া অথবা ফেরার পথেই বাঘকে মারবে এমন আশা করছে সে। একনলা গ্রীনার বন্দুকের নলের সঙ্গে তিন ব্যাটারীর টর্চ লাগিয়ে নিয়েছে ক্লাস্পে। গ্রীনার নাম-করা বন্দুক। ডাবলিউ, ডাবলিউ, গ্রীনার। ইংরেজদের কোম্পানী। টিকায়েতের বন্দুকের বত্রিশ ইঞ্চি লম্বা ব্যারেল। রেঞ্জও ভাল। বাঘ যদি কাছাকাছি আসে তবে লেথাল বল্‌এর গুলি বাঘের ভাইটাল জায়গায় লাগলে বাঘ যে মরবে না, এমন কথা বলা যায় না।

আস্তু আস্তু পলাশবনার পশ্চিম দিগন্তে লালটুলিয়া পাহাড়ের আড়ালে সূর্য বিদায় নিলো। আমি সারাদিন ঘুমিয়েছি। রাতে আমিই পাহারা দেবো। টেড ঘুমোবে ঘরের বাইরে চোপাইতে। তেঁতুলতলাতে ছায়া জমবে ঘন হয়ে কৃষ্ণপঙ্কের রাতে। একটু চাঁদও উঠবে শেষ রাতে। তাই সেখানে ঘুমোলে ঘুম চিরঘুমও হতে পারে। ঘরের মধ্যে

টিরিদাদা ঘুমোবে ।

কিন্তু টিরিদাদা কী ঘুমোতে পারবে? টিকায়ত্তের পাঠানো যবেব ছাতু ঘি, কাঁচা লঙ্কা, কাঁচা পেঁয়াজ দিয়ে সে লিট্টি বানিয়েছিলো, তা খেয়ে এই গরমে আমাদের ত প্রাণ আই-টাঁই । আমার তাও দেশী পেট—মামাবাড়ি গিরিভিতে: লিট্টি-ফিট্টি খাওয়া অভ্যাস আছে । কিন্তু বেচারী টেডএর অস্ট্রিয়ান পেটে এই লিট্টি যে কোন আলোড়ন তুলছে তা টেডই হাড়ে হাড়ে বুঝছে । দেখি সে পেটে ভিজ়ে গামছা জড়িয়ে চৌপাইতে বসে হাঁসফাঁস করছে আর টিরিদাদাকে দোষারোপ করছে ।

রাত আটটা বাজতে না বাজতেই গ্রামের সমস্ত শব্দ মরে গেলো । তাঁটা পড়লে, সুন্দরবনের টাঁাকে যে এক গভীর, বিষন্ন অথচ যে-কোনো সাংঘাতিক ঘটনার জ্ঞে তৈরী এক নিভৃত নীরবতা নেমে আসে তার সঙ্গে এই মানুষখেকো বাঘের রাজত্বের রাতের স্তব্ধ নীরবতার তুলনা চলে । গ্রামের কুকুর-গুলোও যেন কেমন ভয়ান্ত গলায় ডাকছে । একটা বড় ছতোম পেঁচা উড়ে গেল ছরগুম্ ছরগুম্ ছরগুম্ করে ডাকতে ডাকতে তেঁতুলতলার অঙ্ককার ছেড়ে । দূরে, ছুটি ছোট পেঁচার ঝগড়া বাধল যেন কী নিয়ে । কিঁচি কিঁচি কঁচর্ কিঁচি কিঁচি কিঁচর্ আওয়াজ করতে করতে ঘুরে ঘুরে উড়ে উড়ে বেড়াতে লাগল ওরা । কিন্তু মনে হলো, ওদের মামলা সেই রাতে নিষ্পত্তি হবার নয় ।

টিরিদাদা ঘর থেকে হাই তুলে বলল, হায় রাম ! হায় রাম !

তারপরই সুর করে গুন্‌গুনিয়ে তুলসীদাস আবৃত্তি করতে লাগল।

কিছুক্ষণ পর টিরিদাদা এবং টেড হুজনেই ঘুমিয়ে পড়ল।

ঘরের বাইরে দেওয়ালের কাছে আমার চৌপাইটা টেনে এনে, দেওয়ালে হেলান দিয়ে বাইরের দিকে চেয়ে বসে থাকলাম আমি, আমার ছু উরুর উপরে আমার প্রিয় রাইফেলটা আড়াআড়ি করে রেখে। এই রাইফেলটা টেডএর দেশে তৈরী। ম্যানলিকার স্তনার। ক্যালিবার পয়েন্ট থ্রি-সিক্স। এই দিয়ে আমি ছায়াাকেও মারতে পারি, অঙ্ককারে দৌড়ে যাওয়া জংলি ইঁহুরকেও, এমনই বোঝা-পড়া হয়ে গেছিল আমার রাইফেলটার সঙ্গে বারো বছর বয়স থেকে। এই রাইফেলটা যদি কথা বলতে পারত তাহলে তোমাদের অনেক অনেক গল্প বলতে পারত। গল্প নয়; সত্যি কথা সব।

দূরের মছয়া গাছগুলোর নিচে শস্যরের দল মছয়া কুড়িয়ে খাচ্ছে। হাওয়াতে মছয়ার গন্ধ আর করোঞ্জের গন্ধ ভাসছে; হঠাৎ মছয়াতলাতে একটা ছড়োছড়ি পড়ে গেল। বোধহয় ভাল্লুকদের সঙ্গে মছয়ার ভাগ নিয়ে কথা কাটাকাটি হচ্ছে শস্যরের।

তোমবা কী কখনও ভাল্লুকদের গাছে চড়তে দেখেছো? দেখলে হেসে কুল পাবে না। ওরা পেছন দিক দিয়ে গাছে ওঠে। কেন যে অমন করে ওঠে তা জিগগেস করার ইচ্ছে আছে অনেকদিনের কিন্তু একটাও বাংলা বা ইংরিজী জানা ভাল্লুকের সঙ্গে দেখা-না-হওয়ায় জিগগেস করা হয়ে ওঠেনি। ওদের নিজেদের ভাষায় শব্দ বড় কম এবং আমাদের অভিধানে

তাদের মানেও লেখা নেই।

টিকিয়েত কী করছে এখন কে জানে। এমন অন্ধকার চারদিকে যে, মনে হয় অন্ধকার মুখে-চোখে ঝাঞ্জড় মারছে। হুঁহাত দিয়ে অন্ধকারের চাদর সরিয়ে দেখতে চাইলেও কিছুই দেখা যায় না।

গরমের দিনে জঙ্গলে হাওয়া বয় একটা। শুকনো লাল হলুদ পাতা ঝরিয়ে পাথরে আর রুধু মাটিতে গড়িয়ে সেই হাওয়া ঝর্ ঝর্ সড়্ সড়্ শব্দ তুলে বেগে বয়ে যায় দমকে দমকে। তখন টিরিদাদার ভাষায় : যত সব কাটনেওয়ালী জানোয়ারদের চলাফেরার ভারী সুবিধা। শব্দের মধ্যে, মর্মরধ্বনির মধ্যে তাদের পায়ের শব্দ শুনতে পায় না কিনা অশ্রু অহিংস্র জানোয়ারেরা!

নিস্তরু বন জঙ্গলে যখন হাওয়া থাকে না, নিথর হয়ে থাকে যখন আবহাওয়া, তখন একটা ঝরা-পাতা মাটিতে পড়ার আওয়াজকেও বোমা পড়ার আওয়াজ বলে মনে হয়। জংলী ইঁদুর বা গিরগিটি মরা ঘাস পাতার উপর দিয়ে দৌড়ে গেলে মনে হয় কোনো বড় জানোয়ারই বা দৌড়ে গেল বৃষ্টি। যখন চোখ কোনো কাজে লাগে না তখন কান দিয়েই দেখতে হয়।

এই অন্ধকার, তারা-ফোটা হালকা নীল সিন্ধু শাড়ির মত উদ্বেল আকাশ যেন উড়তে থাকে মাথার উপরে আদিগম্ভু চাঁদোয়ার মত। হাওয়াতে তারারা কাঁপে, মনে হয় মিটমিট করে। দারুণ লাগে তখন তাকিয়ে থাকতে। অন্ধকারের এক দারুণ পুরুষালী মৌনী রূপ আছে। তোমরা যদি মনের সব

জানালাগুলো খুলে দিয়ে, ইন্দ্রিয়ের আন্তরিকতা দিয়ে সেই রূপকে অনুভব করার চেষ্টা করো, তাহলে নিশ্চয় তা অনুভব করতে পারবে। এমন সব অন্ধকার রাতেই ত আলোর তাৎপর্য, আলোর আসল চেহারাটা বোঝা যায়। অন্ধকার নইলে, আলো আলোকিত করত কাকে ?

দেওয়ালে হেলান দিয়ে বসে এসব ভাবছি। টেড রীতিমত নাক ডেকে ঘুমোচ্ছে। ওর নাক ডাকলে অন্তত একটা ফিচিক্ ফিচিক্ করে আওয়াজ হয়। সাহেবদের ব্যাপারই আলাদা। আর ঘরের মধ্যে টিরিদাদা! এ রোগা সিঁড়িঙ্গ চেহারা হলে কী হয়, ওর নাক-ডাকা শুনলে মনে হয় ধাঙ্গড়পাড়ার কোনো কোঁৎকা শুরোরকে বুঝি কেউ জলে ডুবিয়ে মারছে।

টাঁড়াবাঘোয়া যদি কাছাকাছি এসে পড়ে তবে নির্ঘাৎ টিরিদাদার জগ্গেই আসবে এবং তাহলে টিরিদাদার কারণেই বাঘকে গুলি করার সুযোগ পাবে।

কিন্তু বাঘ যদি সত্যিই এসে পড়ে তাহলেও কী গুলি করা মানা! টিকায়তকে জিজ্ঞেস করা হয়নি। কথা ছিল, আমরা বাঘ মাবতে যাবো না তিনদিন। কিন্তু বাঘ যদি আমাদের মারতে আসে তাহলে কী করব সে কথা আমাদের “জেন্টলমেনস্ এগ্রিমেন্টে” লিখতে ভুল হয়ে গেছে। মহা চিন্তার কথা হলো।

জঙ্গলের মধ্যে ডিউ-উ-ডু-ইট্ পাখি ডাকছে উড়ে উড়ে। ঐ পাখিগুলো যখন আকাশে উড়ে বেড়ায় তখন ওদের লহা পা ছুটি শূন্যে আলতো হয়ে ঝোলে লটপট্ করে, ভারী মজার লাগে দেখতে। এদের চোখ এড়িয়ে রাতের জঙ্গলে কোনো কাটনেওয়াল জ্ঞানোয়ার অথবা মানুষের চলাফেরা করা ভারী

মুশকিল। কি দেখল পাখিগুলো কে জানে ?

এখন ঐ টিলার কাছে অঙ্ককার কেমন ঘন হয়েছে তাই ভাবছিলাম। টিকায়ের মাচাতে একাই বসেছে। তবে, ছুপাশের দুটি গাছে তীর-ধনুক নিয়ে তার দুই অনুচর বসেছে। টিকায়ের মাচাটাই নাকি সবচেয়ে নিচু। নিচু না হলে গুলি করতে অসুবিধা হয়। তবে বেশী নিচু হলে বিপদও থাকে। বিশেষ করে, মানুষকে বাঘের বেলাতে। সেই রঙ্গমঞ্চে এখন কী প্রতীক্ষা আর তিতিক্ষার সঙ্গে বসে আছে পলাশবনা গ্রামের রাজা আমাদের টিকায়ের, কে জানে।

বসে বসে এই সব ভাবছি। আর ঘুমিয়ে যাতে না পড়ি সে কথা নিজেই মনে করিয়ে দিচ্ছি, ঠিক এমন সময় আমাদের সোজা সামনে প্রায় মাইল খানেক ভিতরে গভীর জঙ্গলের ভিতর থেকে বাঘের ডাক শোনা গেল। উম্—আঁও—।

গভীর রাতের সমস্ত শব্দমঞ্জরী, পিউ-কাঁহা পাখির ক্রমাগত ডাক, পেঁচাদের চেষ্টানি সব মুহূর্তের মধ্যে থেমে গেল। এই জ্বলন্তই বাঘকে বলে, বনের রাজা। সে কথা বললে বনের সব প্রাণী চুপ করে থাকে সম্মানে ; সম্মানে।

বাঘ যেদিক থেকে ডাকল সেই দিকে তাকিয়ে আছি, ঠিক সেদিক থেকে অল্প একটা বাঘের ডাক ভেসে এল। এই ডাকটা অনেক বেশী গম্ভীর, ভারী এবং জোর। মনে মনে ভাবলাম, ঐ দ্বিতীয় বাঘটাই টাঁড়বাঘোয়া।

হঠাৎ দেখি টেড উঠে বসেছে চৌপাইয়ে।

আমার দিকে তাকিয়ে থেকে চোখ কচলে বলল, বাঘেরা কি মিছিল করে বেরল নাকি ?

আমি বললাম, শ্—শ্—শ্— ।

এমন সময় প্রথম বাঘটা আবার ডাকল এবং ডেকে দ্বিতীয় বাঘটার দিকে এগিয়ে যেতে লাগল । একদল হুম্মান ছপ্—ছপ্—ছপ্ ডাক ছেড়ে পাতা-ঝরা গাছেদের ডালে ডালে ঝাঁপাঝাঁপি শুরু করে দিল ।

টেড বলল, ছুজনে মিলে বুড়ি আর টিকায়েরত যদিকে আছে সেদিকে যাচ্ছে । বুঝলি ।

আমি বললাম, তাই-ই ত মনে হচ্ছে ।

টেড বলল, টিকায়েরত ছুটো বাঘকে সামলাবে কী করে একা ? তারপর মাচাও ত শুনলাম বেশী উঁচু করেনি ।

আমি বললাম, সে সেই-ই বুঝবে । তুই চুপ করে শুয়ে পড় না ।

কেন ? চল না আমরা ছুজনে বেরিয়ে পড়ি । বাঘেদের আওয়াজ যখন শোনা গেল তখন চল স্টক করি ।

আমি বললাম, এই অন্ধকারে ? মানুষখেকো বাঘের পিছনে পায়ে হেঁটে ! দিনে হলে তাও কথা ছিল ।

তারপরই বললাম, আমার একটাই জীবন । জীবনটাকে আমি খুবই ভালবাসি । আত্মহত্যার মধ্যে আমি নেই ।

টেড বলল, তুই ভীতু ।

তবে তাই ।

টেড আবার শুয়ে পড়ল ।

ডানদিক থেকে একটা কোটরা হরিণ ক্রমাগত ডাকতে লাগল ভয় পেয়ে । তার স্বাক্—স্বাক্—স্বাক্ ডাক জঙ্গলে-পাহাড়ে ধাক্কা খেয়ে ফিরে আসতে লাগল আমার মাথার

মধো। ডিউ-উ-ডু-ইট পাখিগুলো ডিউ-উ-ডু-ইট, ডিউ-উ-ডু-ইট করে ডাকতে ডাকতে ডানদিকে উড়ে উড়ে সরে যেতে লাগল।

চোখ কান সজাগ রেখে আমি বসে রইলাম। একটু পরই আবার টেডের ফিচিক্ ফিচিক্ করে নাক ডাকার আওয়াজ শুনতে পেলাম। টিরিদাদার নাক ডাকা এখন বন্ধ। কি হল কে জানে।

ডিউ-উ-ডু-ইট পাখিগুলোর ডাক ক্ষীণ হয়ে এসেছিল। ওরা অনেক ডানদিকে চলে গেছিল ততক্ষণে। কে জানে, বাঘ ছটো এখন কোথায়? টিকায়তই বা কি করছে? অত নিচুতে মাচাটা বাঁধা ঠিক হয়নি। ছ ছটো বড় বাঘ। তায় মানুষখেকো।

ঘড়িতে তাকিয়ে দেখলাম, রাত তিনটে বেজে গেছে। আমার বসে থেকে থেকে খুবই ঘুম পেয়ে গেছিল। শেষ রাতের ফুরফুরে হাওয়া, মছয়া আর করৌঞ্জের মিষ্টি গন্ধ; ঘুমের দোষ নেই। পাছে ঘুমিয়ে পড়ি, তাই উঠে পায়চারী করতে লাগলাম রাইফেল হাতে। একবার পিছন ফিরতেই মনে হল একটা ছায়া। যেন সরে গেল তেঁতুলতলার পাশ থেকে। টর্চ ফেলে দেখলাম, শেয়াল। একজোড়া। আলো পড়তেই ওদের দু-জোড়া চোখ জ্বলে উঠল লাল হয়ে। পরক্ষণেই ওরা চলে গেল।

আস্তে আস্তে পুবের আকাশের অন্ধকারের ভার হাল্কা হতে লাগল। অন্ধকারেরও যে কতরকম রঙ, কতরকম ঘনতা, তা ভাল করে নজর করে দেখলে দেখা যায়। অন্ধকারের

গায়ের কালো, ফিকে হতে হতে জ্বোলো ছুধের মত সাদাটে হয়ে যাবে আন্তে আন্তে, তারপর মিত্রি সিঁছরের হালকা গুঁড়োর মত রঙ লাগবে আকাশের পুবের সিঁথিতে। আরও পরে, আসামের পাকা কমলালেবুর রঙের মত লাল হবে। তারপর রোদ উঠলে আলোর রঙকে আর আলাদা করে চেনা যাবে না। সূর্যের সাত রঙ মাখামাখি হয়ে উজ্জ্বল দিনের শরীরে বিশ্বচরাচরকে আলোকিত করে তুলবে। রাতের পাখিরা, রাতের প্রাণীরা ঘুমুবে; দিনের পাখি, প্রজাপতি, নানান প্রাণী জেগে উঠবে। ভোরের মিষ্টি ঠাণ্ডায় আর দিনের আলোর অভয়-আশ্বাসে কচি পাতা ছিঁড়ে খাবে চিতল হরিণের দল। শস্যেররা গাঢ় জঙ্গলের ভিতরে কোনো নালায় ছায়াতে গিয়ে ঢুকবে! শুয়োরেরা নেমে যাবে পাহাড়তলীর খাদে। রাতভর পেটভরে খাওয়ার পর চিং-পটাং হয়ে পড়ে থাকবে এ ওর ঘাড়ে ঠ্যাং তুলে দিয়ে।

ভোর হয়ে আসছে, এমন সময় পরপর দু-দুটো গুলির আওয়াজ কানে এলো। প্রথম গুলিটা থেকে পরের আওয়াজটা দু মিনিট মত বাবধানে হল।

তারপর সব চুপচাপ।

টেড গুলির শব্দে লাফিয়ে উঠল। টিরিও বাইরে এলো। কথা না বলে, কাঠের উলুনে চায়ের জল চাপালো। তারপর বালটিতে করে জল আর হাতে করে ঘটি নিয়ে এলো আমাদের জন্তে।

টেড বলল, দেখলি, তোকে বলেছিলাম, মিছিমিছিই এলাম আমরা। টিকায়তই মেরে দিল দু-দুটো বাঘ। তার কথা

রাখল। এবার চল, টিকিয়েত্তের মাঠরী আব চা খেয়ে মছয়া-
মিলনে ফিরি আমরা। আর এখানে থেকে কী করব ?

আমি বললাম, গাঁয়ের লোকেরা একটা শম্বর মেরে দিতে
বলেছিলো যে, ওদের। বলেছিলো, বছদিন ভাল করে মাংস
খায় না ওরা! কথা দিয়েছিলাম, একটা শম্বর মেরে দেবো
ওদের খাওয়ার জন্ত। মাংস ওদের দিয়ে, আমরা চামড়াটা
নিয়ে চলে যাব।

টেড বলল, বুঝলি, এবার একটা স্মাটকেশ বানাবো আমি,
তুই শম্বর মারলে।

তারপর বলল, কিন্তু এই এমনভাবে বলছিস যে, মনে হচ্ছে
গাঁয়ের লোকে তোর জন্তে যেন শম্বর গাছতলাতে বেঁধে রেখেছে ?

আমি বললাম, বেঁধে রাখবে কেন ? বাঘ মরে গেছে তো
আর ওদের জঙ্গলে যেতে ভয় নেই কোনো। ওরা জঙ্গলের সব
খবরই রাখে। জানোয়ারদের বাহান্ সাহান্-এরও। ওরা
হাঁকোয়া করবে আর জায়গামতো আমরা রাইফেল নিয়ে
দাঁড়ালেই মারা পড়বে শম্বর।

তা হতে পারে।

বলেই, টেড বলল, আমি তাহলে একটু ঘুরে আসছি।

তারপর বলল, টিরিদাদা এক ঘটি জল দাও জঙ্গলে ঘুরে
আসি।

আমি বললাম, খালি হাতে যাস না, রাইফেলটা নিয়ে যা।

টেড বলল, রাইফেল আর কি হবে ? বাঘ তো মরেই
গেছে।

টেড আর টিরিদাদা ঘুম থেকে উঠে পড়ার পর আমার ছ

চোখে ঘুম যেন ভেঙ্গে এলো ।

চোপাইটা টেনে নিয়ে আমি শুয়ে পড়লাম ।

টিরিদাদা চা আর মাঠরী এনে ডাকলো আমাকে ।

চোখ মেলে দেখলাম, টেড ফিরে আসছে জঙ্গল থেকে ।

হঠাৎ টিরিদাদা দূরে চেয়ে বলল, ও কি ? কারা অমন দৌড়ে আসছে ?

টেড ও আমি তাকলাম ওদিকে । ততক্ষণে গ্রামের অনেক লোক আমাদের কাছে চলে এসেছে । আমাদের যখন সকাল, গ্রামের লোকের তখন অনেক বেলা । ছোটো লোক ডানদিক থেকে দৌড়ে আসছে আর টিকায়ত্তের সাদা ঘোড়াটাকে লাগাম ধরে কে যেন নিয়ে চলেছে ঐ লোকগুলোর দিকেই । টিকায়ত্তের সহিস হবে ।

ছুটে-আসা লোক ছোটোর সঙ্গে যখন ঘোড়া আর সহিসের দেখা হলো তখন ওরা সকলে মিলে একসঙ্গে আমাদেরই দিকে জোরে ফিরে আসতে লাগল । সহিস, যে ঘোড়াটাকে হাঁটিয়ে নিয়ে যাচ্ছিল ঐদিকে এতক্ষণ, সে-ও ঘোড়ার পিঠে উঠে জোরে ঘোড়া ছুটিয়ে ওদের আগে আগেই আমাদের কাছে এসে পৌঁছে গেল ।

ঘোড়া থেকে নেমেই সহিস বলল, খাত্‌রা বন্‌ গীয়া সাহাব । খাত্‌রা বন্‌ গীয়া । ভারী খাত্‌রা ।

গ্রামের লোকেরা উঁচু নিচু নানা স্বরে চৈঁচিয়ে উঠল, খাত্‌রা বন্‌ গীয়া হো ও-ও-ও-ও, খাত্‌রা বন্‌ গীয়া ।

আর সেই ডাকের সঙ্গে সঙ্গে পিল্‌ পিল্‌ করে ছেলে বৃড়ো মেয়ে সবাই দৌড়ে এল এদিকে ।

সহিস, আমাদের হুঃসংবাদটা দিয়েই জ্বোরে ঘোড়া ছুটিয়ে চলে গেল টিকায়ের বাড়িতে খবরটা দিতে। ততক্ষণে সেই ছুটে আসা লোক দুটোও আমাদের কাছে পৌঁছে গেছে।

ওরা এসেই ধ্বপু করে মাটিতে বসে পড়ল। ওরা যা বলল, তার সারমর্ম হল এই—

বাঘ দুটো সারারাত টিলার অগ্ন পাশে ছিল। ওদের সামনে দিয়ে একবারও যায়নি। ওদের অনেক পিছন দিয়ে ঘুরে গিয়ে টিলার পিছনে পৌঁছেছিল, তাই টিকায়ের গুলি করার সুযোগ আসেনি। টাঁড়বাঘোয়া নয়, অগ্ন বাঘটা বোধহয় কোনো হরিণ-টরিণ মেরে থাকবে। সেটাকে ওরা দুজনে মিলে টেনে নিয়ে গেছিল টিলার পিছনে। কোনো কিছু টেনে নিয়ে যাবার আওয়াজ পেয়েছিলো ওরা। টিলার কাছাকাছি অন্ধকার এত ঘন ছিল যে, চোখে নিজের হাত-পা-ই ওরা নিজেরা দেখতে পাচ্ছিলো না অন্ধকারে। দূরের কিছু দেখার কথাই ওঠে না। সারারাত বাঘ দুটো জানোয়ারটার মাংস ছেঁড়াছেঁড়ি করে হাড় কড়মড়িয়ে খেয়েছে আর মাঝে মাঝে গৌ গৌ করেছে। বুড়ির মৃতদেহ যেখানে পড়েছিলো সেখানে কিন্তু একবারও আসেনি একটা বাঘও, সারা রাতে।

যখন প্রায় ভোর হয়ে এসেছে, তখন টাঁড়বাঘোয়া আস্তে আস্তে, হয়ত মুখ বদলাবার জগ্গেই বুড়ির পা আর মাথা যেখানে পড়েছিলো সেইদিকে এগিয়ে এসে বুড়িকে খেতে শুরু করল। বিরাট বাঘটাকে তখন আবছা আলোতেও দেখা যাচ্ছিলো। আবছা-আলোতে খুব ভাল করে অনেকক্ষণ ধরে

নিশানা নিয়ে টিকায়ত গুলি করে। গুলি লেগেছিলো
টাঁড়বাঘোয়ার গায়ে। ঠিক কোন্ জায়গায় তা ওরা বলতে
পারবে না।

গুলি খাওয়ার সঙ্গে সঙ্গেই বাঘটা একটা সোজা লাফ
দিয়ে উপরে উঠলো প্রায় পনেরো ফিট। তার পরে ধপাস
করে পড়ল নিচে, ডিগবাজী খেয়ে। পড়েই, আর এক লাফে
টিলার আড়ালে চলে গেলো একটুও শব্দ না করে। আর
সঙ্গে সঙ্গে একটা বাঘিনী বেরিয়ে এলো টিলার আড়াল
থেকে, বেরিয়ে এসে যেখানে টাঁড়বাঘোয়ার গায়ে গুলি
লেগেছিল, ঠিক সেখানেই এসে দাঁড়াল। টিকায়ত ততক্ষণ
ফোটা গুলিটা বদলে নিয়েছিল। বাঘিনী এসে দাঁড়াতেই
টিকায়ত আবার গুলি করল। চমৎকার গুলি। গুলিটা
পাশ ফিরে দাঁড়ানো বাঘিনীর বুক লাগল। বুক লাগতেই
একবার যেন পড়ে যাচ্ছে বলে মনে হল বাঘিনীটা কিন্তু
তারপরই টিকায়তের মাচা দেখতে পেয়ে জোরে কিছুটা নিচু
হয়ে দৌড়ে এসেই সোজা লাফ মারল মাচার দিকে। গুলি
পাণ্টাবার সময়টুকুও পেলো না আর টিকায়ত। দোনলা
বন্দুক থাকলে মেরে দিতো নিশ্চয়ই আরেকটা গুলি। কিন্তু
এক লাফে সোজা এসে পড়ল মাচাতে তারপর টিকায়তের
গলা কামড়ে মাচা ভেঙ্গে ছুজনে নিচে পড়ল। নিচে পড়তেই,
টিলার আড়াল থেকে টাঁড়বাঘোয়া জোরে দৌড়ে এসে
টিকায়তকে কামড়ে ধরলো তারপর ছুজনে টানাটানি করে
তাদের চোখের সামনেই টিকায়তের হাত-পা সব আলাদা
করে ফেলল।

টেড বলল, বেঁচে ছিলো টিকায়ত্ত তখনও? বেঁচে আছে?

ওরা বলল, টিকায়ত্তের ঘাড় কামড়ে ধরতেই সে মরে গেছিল।

টেড আবার বলল, তোমরা তীর ধনুক নিয়ে কি করছিলে? মারতে পারলে না তীর? মজা দেখতে গেছিলে নাকি তোমরা?

প্রথম লোকটা বলল, যতক্ষণ বুঝিনি যে, টিকায়ত্ত মরে গেছে ততক্ষণ মারিনি। যেই বুঝলাম যে, সে আর বেঁচে নেই তক্ষুনি আমরা ছুজনেই সমানে তীর মারতে লাগলাম। যদিও তখন চোখের সামনে ঐ দৃশ্য দেখে আমাদের বেহুঁশ অবস্থা। তবুও তিন-চারটে করে তীর লেগে থাকবে এক একটা বাঘের গায়ে।

আমি অধৈর্য হয়ে বললাম, তারপর কি হলো?

তারপর? বলেই, লোকটা চূপ করে থাকল।

ছটৌ লোকেরই চোখ মুখ দেখে মনে হল যে ওরা বোধহয় পাগল হয়ে গেছে, বা হয়ে যাবে এক্ষুনি।

একজন বলতে গেল, তারপর...

বলেই, থেমে গিয়ে ছ হাত দিয়ে উঠোনের ধুলো স্তূপে ভরে আবার ফেলতে লাগল।

অন্যজন থমথমে নিচু গলায় বলল, তারপর টিকায়ত্তের একটা হাত শুধু ফেলে রেখে, টিকায়ত্তকে ছ টুকরো করে ছ জনে মুখে করে নিয়ে টিলার আড়ালে চলে গেল।

এইটুকু বলেই, লোকটা কান্নায় ভেঙ্গে পড়ল।

ভয়ে আতঙ্কে ওরা দু জনেই তখন কাঁপছিলো।

আমরাও স্তম্ভিত হয়ে গেলাম। কি বলব, কেমন করে বলব ভেবে পাচ্ছিলাম না।

টেড বলল, এখনও কি বাঘ দুটো ওখানেই আছে ?

অণু লোকটা বলল, তা কি করে বলব ?

সেই সময় টিকায়ত্তের এগারো সন্তানের মধ্যে পাঁচজন হাজির হল এসে আমাদের সামনে। পাঁচটিই ছেলে, বড় ছেলেটির বয়স হবে চোদ্দ-পনেরো। সে কেঁদে হাতজোড় করে টেডকে বলল, সাহাব, মেরা বাবুজী কী খুন্কা বদলা লিজিয়ে আপলোগোনে। ইয়ে গাঁওকে যিত্না আদমি হয়, যিত্না ধন-দৌলত হয় সব আপলোগোকো দে হুংগা। বদলা লিজিয়ে সাহাব।

বলেই, ঝরঝর করে কাঁদতে লাগল।

টিরিদাদা তখনও চা আর রেকাবীতে মাঠরী নিয়ে দাঁড়িয়েছিলো স্ট্যাচুর মত আমাদের পাশে।

টেড তাড়াতাড়ি গামছা ছেড়ে শর্টস আর থাকী বুশ কোট পরে নিল। নিয়ে ওর ফোর-ফিফ্টি-ফোর হাণ্ডে ডাবল-ব্যারেল রাইফেলটা নিয়ে, বেরিয়ে এল ঘর থেকে। বুক পকেটের খোপে খোপে ছটি গুলি ভরে নিল। দু ব্যারেলে ছটি ভরল। আমি ত তৈরীই ছিলাম। সারা রাত জেগে ছিলাম, এককাপ চা খেয়ে গেলে ভালই হতো। কিন্তু তখন চা খাওয়ার মত মনের অবস্থা ছিল না।

কিন্তু টিরিদাদা ও গাঁয়ের লোকেরাও আমাদের জোর করল। বলল, কখন ফিরবেন তার ঠিক নেই। ফিরতে ফিরতে

রাতও ত হতে পারে ।

ফিরতে যে না-ও পারি, সে কথা আর মুখে কেউই বলল না ।

বলল, চা-এর সঙ্গে ভাল করে নাস্তাও করে যান ।

নাস্তা-ফাস্তা করার মত অবস্থা তখন একেবারেই ছিলো না আমাদের । শুধু মাঠরী দিয়ে চা খেলাম । টিকিয়েতেরই পাঠানো মাঠরী । এতক্ষণে আমরা যেভাবে মাঠরী খাচ্ছি সেইভাবে টাড়াবাঘোয়া আর তার সঙ্গিনী টিকিয়েতের শরীরটাকে খাচ্ছে হয়ত । ঈস্‌স্‌! ভাবা যায় না, জলজ্যান্ত লোকটা !

ছুজনের কাঁধে ছুটো জলের বোতল দিয়ে দিল টিরিদাদা । আমরা সকলের কাছে বিদায় নিয়ে এগোলাম ।

কয়েক পা এগিয়েছি, এমন সময় একটি চক্ৰিশ-পঁচিশ বছরের লোক দৌড়ে এসে আমাদের পায়ের কাছে ছমড়ি খেয়ে পড়ল । সকলে বলল, ওর বোকেই নিয়ে গেছিল টাড়াবাঘোয়া প্রথম দিন ।

লোকটার হাতে একটা মস্ত চক্চকে টাঙ্গী । কাঁধে তীর ধনুক । ও বলল, আমাকে সঙ্গে নিন আপনারা । আমি টাড়াবাঘোয়ার মাথায় নিজে হাতে টাঙ্গী মারব । টাঙ্গী মেরে আমার বাসমতীর মৃত্যুর বদলা নেবো ।

আমরা চলতে চলতেই ওকে অনেক বুঝিয়ে, তারপর ফেরৎ পাঠালাম ।

টিরিদাদা গ্রামের শেষ পর্যন্ত এলো । আমরা ছুজনেই ওর মুখের দিকে চাইলাম ।

বললাম, চলি টিরিদাদা।

টিরিদাদার মুখটাকে ফ্যাকাশে দেখাচ্ছিলো।

কী যেন বলতে গিয়েও বলতে পারলো না। বোধহয় ও আমাদের যেতে মানা করবে ভেবেছিল। তারপর গ্রামের এতগুলো লোকের মুখের দিকে তাকিয়ে, টিকায়েতের ছেলের কান্না-ভেজা মুখের দিকে চেয়ে বলল, এসো, এসো। যাওয়া নেই, এসো।

তারপর জোর করে মুখে হাসি ফুটিয়ে বলল, তোমাদের জন্তে ফাস্টক্লাস ভাত আর মুরগীর ঝোল রন্ধে রাখব। এসেই, চান করে খেতে বসে যাবে। যাও, দেরী কোরো না ফিরতে। আমি কিন্তু না খেয়ে বসে থাকব তোমাদের জন্তে।

গ্রামের লোকের কাছে শুনলাম যে, টিকায়েতের মা এখনও বেঁচে আছেন। উনি এবং টিকায়েতের স্ত্রীও হয়ত কাল বিকেলে এমনি করেই টিকায়েতকে বিদায় দিয়েছিলেন।

আমি খুবই উত্তেজনা বোধ করছিলাম। মানুষখেকো বাঘের অভিজ্ঞতা এর আগে কখনও হয়নি। তারপর আবার একসঙ্গে দু-দুটো আহত বাঘ-বাঘিনী। টাড়াবাঘোয়ার পায়ের দাগ দেখে এবং বর্ণনা শুনেই ত তার চেহারা সম্বন্ধে অনুমান করে নিয়েছিলাম। বাঘিনী টাড়াবাঘোয়ার চেয়ে ছোট, কিন্তু সেই-ই ত মাচায় উঠে ধরেছে টিকায়েতকে। এখন দুজনেই গুলি খেয়ে যে কী সাংঘাতিক হয়ে আছে কে জানে ?

টেড নিচু স্বরে বলল, টিকায়েত কিন্তু খুবই ভাল শিকারী। ভোরের আবছা-আলোতে দু দুটো বাঘকেই উনি গুলি করেছিলেন ভাইটাল জায়গাতে। কিন্তু, এই জন্তেই আমি

সব সময় বলি তাকে যে, হেভী রাইফেল ছাড়া বন্দুক নিয়ে বাঘ মারতে আসা বড় বিপদের। তোর রাইফেলটাও এবার কোলকাতায় ফিরে বদলে নে তুই। পায়ে হেঁটে বাঘের মোকাবিলা করতে সব সময়েই হেভী রাইফেল নিয়ে যাওয়া উচিত। ঐ গুলি দুটি যদি রাইফেলের হতো তবে বাঘ বাবাজীরা এখানেই শুয়ে থাকত। তবে টিকায়ত বাঘিনী মাচায় উঠতেই দ্বিতীয় গুলি হয়ত করে ফেলতে পারতো। এই সব কারণেই গুঁকে মানা করেছিলাম একনলা বন্দুক না-নিয়ে যেতে। শুনলে না। কী আর করব আমরা ?

তারপর বলল, তাছাড়া, আমার দৃঢ় বিশ্বাস গুলিগুলো খুবই পুরোনো ছিল। কে জানে কোথা থেকে কিনেছিল। গুলি ভাল থাকলে সতি সতাই দু দুটো বাঘই বেচারী মারতে পারত। নিজেও মরত না।

আমি বললাম, দুজনে একসঙ্গে থাকলে কিন্তু হবে না টেড। টিলাটার কাছে গিয়ে আমাদের আলাদা হয়ে যেতে হবে। তুই কার পিছনে যাবি? টাঁড়বাঘোয়া? না বাঘিনী?

টেড বলল, আমরা মারতে পারলেও, দুটো বাঘের একটাও তো আমাদের কারোই হবে না, কারণ প্রথম রক্ত তো টিকায়তের গুলিতেই বেরিয়েছে।

আমি বললাম, তা ঠিক।

তোমরা হয়তো জানো না যে, শিকারের অলিখিত আইনে বলে, যার গুলিতে প্রথম রক্তপাত ঘটবে, শিকার তারই। যদি কোনো শিকারীর গুলি বাঘের লেজে লেগেও রক্ত বেরোয়

এবং বাঘ সান্ধাৎ যম হয়ে থাকে, তবুও যে শিকারী নিজের প্রাণের ঝুঁকি নিয়ে সেই বাঘকে অনুসরণ করে গিয়ে মারবেন বাঘ সেই শিকারীর হবে না। যিনি লেজে গুলি করে রক্ত বের করেছিলেন, তাঁরই হবে। সকলেই মেনে নেবেন যে, বাঘ প্রথম জনই মেরেছেন।

চারদিকে চোখ রেখে হাঁটতে হাঁটতে ভাবছিলাম, এ তো আর বাহাছুরী বা হাততালির ব্যাপার নয়। বাঘ কার হলো, তারও ব্যাপার নয়। পাহাড় জঙ্গলের গভীরে একটি ছোট্ট গ্রামের সব কটি মানুষ তাদের বাঁচা-মরা, তাদের আশা-ভরসা, তাদের সব বিশ্বাস আমাদের হাতে তুলে দিয়েছে আশ্চর্যিকভাবে, চোখের জলে। আমাদের বয়স এবং অভিজ্ঞতা কম হলেও, আমরা যাতে তাদের বিশ্বাসের যোগ্য হতে পারি, তাদের চিরদিনের কৃতজ্ঞতাভাজন হতে পারি তারই চেষ্টা করতে হবে।

আমরা কি পারব এই কঠিন কাজের যোগ্য হতে ?

আমরা দুজনেই নিজের নিজের মনে সে কথা ভাবছিলাম। মুখে কথা ছিলো না কারোই। যদি বিপদমুক্ত করতে পারি ওদের তবেই না আমাদের মান থাকবে আর যদি না পারি ?

নাঃ, সে সব ভাবনা এখন থাক।

টেড বলল, এখন ভীষণ কষ্ট হচ্ছে। কাল সকালে টিকায়তকে অমন করে না বললেও পারতাম। আমি কি স্বপ্নেও ভেবেছিলাম যে এত তাড়াতাড়ি আমার রসিকতা সত্যি হবে ?

কি বলেছিলি তুই ?

বলিনি? যে, কালই আপনাকে দাহ করতে হবে আমাদের?

কুয়োতলাটা পেরিয়ে গিয়েই হঠাৎ টেড ঘুরে দাঁড়াল। পকেট থেকে একটা আধুলি বের করে বলল, এক সেকেণ্ড দাঁড়া। টস্ করছি। যে জিতবে, সেই টাঁড়বাঘোয়ার দায়িত্ব পাবে যে হারবে সে বাঘিনীর। ওকে?

আমি বললাম, ওকে।

আসলে আমাদের দুজনেরই ইচ্ছা ছিলো যে টাঁড়বাঘোয়ার পিছনেই যাই। সে-ই যে নাটের শুরু।

টেড বলল, তোর কি।

আমি বললাম, টেল!

টেড অনেক উচুতে ছুঁড়ে দিল আধুলিটা। মাটিতে পড়েই কিছুটা গড়িয়ে গিয়ে লাল ধুলোর মধ্যে একটা শালের চারার গোড়াতে আটকে গেল সেটা। আটকে যেতেই উন্টে গেল।

আমরা দুজনেই সেখানে পৌঁছে দেখলাম, টেল রয়েছে উপরে। হেড নীচে।

টেড আমার সঙ্গে হাওশেক করল।

আমরা দুজনেই জানতাম যে বে-জায়গায় গুলি-লাগা বাঘ সাক্ষাৎ যম হয়ে ওঠে। তার কারণ, যতক্ষণ বাঘের চারটি পা এবং মুখ এবং মস্তিষ্ক ঠিক থাকে ততক্ষণ বাঘ পুরোপুরি সমর্থ। তার উপর পেটে গুলি লাগলে অ্রচণ্ড যন্ত্রণার কারণে তার মেজাজ তিরিঙ্কি হয়ে থাকে। সেই দিক দিয়ে দেখলে টাঁড়বাঘোয়া এখন বাঘিনীর চেয়ে অনেক বেশী ভয়াবহ—তার চেহারার বিরাট বাদ দিয়েও! বাঘিনীর

গুলি লেগেছে বুকে—অবশ্য লোক ছুটো ভুলও বুঝতে পারে—
ভুল বোঝা একটুও অস্বাভাবিক নয়—। কিন্তু যদি ঠিক বুঝে
থাকে, তাহলে বাঘিনীর লাংস কিংবা হাটে গুলি লাগা অসম্ভব
নয়। হাটে লাগলে প্রায় সঙ্গে সঙ্গে মরে যাওয়ার কথা।
লাংসে লাগলে কিছুক্ষণ বাঁচে। লাংসে গুলি লাগলে বাঘের
গায়ের থেকে যে রক্ত বেরোয়, তাতে ফেনা দেখা যায় অনেক
সময়। ওখানে গেলেই বোঝা যাবে। কিন্তু আসল কথাটা
হচ্ছে এই যে, ছুটি বাঘই খুব সম্ভব মানুষকে কোঁ এবং সত্ত
আহত।

অতএব...

সাবধানে, চারদিকে চোখ রেখে হাঁটতে হাঁটতে অনেকদূর
এসে গেছি আমরা!

এবার টিলাটার কাছাকাছি এসে পড়েছি। দূর থেকে
দেখা যাচ্ছে টিলাটা। সকালের রোদে মাথা উঁচু করে আছে।
আর একটু এগোতেই মাচাটার ভগ্নাবশেষ দেখা গেল।
চৌপাইয়ের চারটে পায়ী ঠিক আছে। দড়ি ছিঁড়ে এবং পাশের
এক দিকের কাঠ ভেঙ্গে মাচাটা গাছটা থেকে তখনও নিচে
ঝুলছে। কোথাও কোনো শব্দ নেই। ভোরের ফিস্‌ফিসে
হাওয়া আর ছাত্তারেদের ডাক ছাড়া।

আর একটু এগিয়ে যেতেই আমি আর টেড হুজনেই
চমকে উঠলাম।

একটু দূরেই বুড়ির একটি পা পড়ে আছে। নীলরঙা বড়
বড় মাছি ভন্‌ ভন্‌ করছে তাতে। এত হুর্গন্ধ যে, কাছে যাওয়া
যায় না।

আর মাচার থেকে একটু দূরে, সোজা, কি যেন একটা
জিনিস পড়ে আছে। টেডকে ইঙ্গিতে চারপাশে নজর রাখতে
বলে আমি এগিয়ে গিয়ে দেখতে গেলাম জিনিসটা কি ?

কিন্তু না গেলেই বোধহয় ভাল হতো। সিন্ধের পাঞ্জাবী-
সুন্ধ টিকায়েরের বা হাতটি কনুই থেকে পরিষ্কার করে কাটা।
পুরুট্টে বাঁ হাতে হাতঘড়িটা বাঁধা আছে তখনও। সোনার
সাইমা ঘাড় একটা, কড়ে আঙুলে পলার আংটি। আঙুল-
গুলো দেখে মনে হচ্ছে কিছুই হয়নি। হাতটা এমন করে দাঁত
দিয়ে কেটেছে যে দেখলে মনে হয় কোনো মেশিনে কাটা
হয়েছে বুঝি।

টেড একটু এগিয়ে এসে আমার পাশে দাঁড়াল। তারপর
আমাকে ইশারা করে নিজেও এগিয়ে গেল। টাঁড়বাঘোয়া
এবং বাঘিনীর পায়ের দাগ দেখে দেখে আমরা খুব সাবধানে
টিলার উন্টোদিকে এলাম। রাইফেলের সেক্টি-ক্যাচে আঙুল
রেখে।

এখানে পৌঁছেই আমরা আলাদা হয়ে গেলাম। আলাদা
হওয়ার আগে ঘড়িতে দেখলাম সকাল সাতটা বেজেছে।
টেড ফিস্‌ফিস্ করে বলল, সন্ধ্যা হবে সাতটাত্তে। আমাদের
হাতে বানো ঘণ্টা করে সময়। আমরা একা একাই খুঁজব
বাঘদের। যদি দেখা না হয়, সাতটার সময় কুয়োতলায়
পৌঁছাব আমরা। কুয়োতলাই রাঁদেভু-পয়েন্ট আমাদের।

তারপর বলল, গুড লাক্। গুড হাষ্টিং।

আমি হাত তুলে ওকে শুভেচ্ছা জানালাম।

তারপর আমরা ছাড়াছাড়ি হয়ে গেলাম।



টেড গেল পুবে । আমি পশ্চিমে ।

একটু এগোতেই একটা গেম-ট্রাকের দেখা পেলাম ।
অঙ্গলে জানোয়ার-চলা সুড়ি পথ । নানান জানোয়ারের
পায়ের দাগ আছে সেখানে । পথটা বেরিয়েছে একটা ফাঁকা
টাঁড়মত জায়গা থেকে । পথটার গোড়াতেই কতগুলো
কুঁচফলের ঝোপের গায়ে দেখলাম রক্ত লেগে আছে । তখনও
শুকিয়ে যায়নি রক্ত । ঝোপের এমন জায়গাতে লেগে আছে
রক্ত যে মনে হয় বাঘের বুক বা পেট সেই ঝোপে ঘবা খেয়েছে ।
বুক হলে বাঘিনীর বুক, পেট হলে টাঁড়বাঘোয়ার পেট । কারণ
রক্ত বেশ উঁচুতেই লেগে আছে ।

প্রথমটা কিছুক্ষণ রাইফেল সামনে করে আমি হামাগুড়ি
দিয়ে দিয়ে এগোলাম । যাতে নিচে ভালো করে নজর করতে
পারি । নাঃ, কোথাও কিছু নেই । তবে পথে ফোঁটা ফোঁটা
রক্ত পড়ে রয়েছে ।

পথটা একেবেঁকে গেছে । কাছেই, সামনে একটা ঝর্না
আছে । তার ঝরঝর শব্দ শুনতে পাচ্ছি । খুবই সাবধানে
এগোচ্ছি । ঐ অল্পক্ষণের মধ্যেই ঘামে গা এবং হাতের পাতা
ভিজ়ে গেছে আমার । হয়ত ভয়েও ।

মিনিট পনেরো ঐভাবে চলার পর ঝর্নাটার কাছে এসে
গেলাম । তখন আরো সাবধান হলাম ।

এক হাত যাচ্ছি আমি পাঁচ মিনিটে, প্রায় শুয়ে শুয়েই,
যেন একটা শুকনো পাতাও না মাড়ানোর শব্দ হয়, পথের
পাশের ঝোপঝাড়ে যেন একটুও কাঁপন না লাগে । পা ও
হাত ফেলার আওয়াজ যেন নিজের কানেও না শোনা যায় ।

একটা বাঁক আছে সামনে। বাঁকটার কাছে পৌঁছে
আমি চুপ করে শুয়ে পড়লাম। কান খাড়া করে শুনবার চেষ্টা
করলাম, কিছু শুনতে পাই কী না।

নাঃ, কোন শব্দই নেই। ঝর্নার ঝরঝর শব্দ ছাড়া।
ঝর্নার ঐ পারে একটা নীল আর লালে মেশা ছোট্ট মাছরাঙা
পাখি নদীর শুকনো বৃকে একটা ভেসে আসা কাঠের উপর বসে
জলের দিকে একদৃষ্টে চেয়ে কী যেন দেখছিল আর মাঝে মাঝে
আশ্চর্য্য দুঃখ দুঃখ গলায় ডাকছিল। হঠাৎ পাখিটা যেন ভীষণ
ভয় পেয়ে সোজা উপরে উড়ে গেল জ্বোরে ডাকতে ডাকতে।

আমাকে কি ও দেখতে পেল? নাঃ। আমাকে দেখতে
পাওয়ার কোনো সম্ভাবনাই ছিল না। তবে? কেন ও ভয়
পেয়ে উড়ল? এই কথা ভাবছি, ঠিক এমন সময় জলের মধ্যে ছপ
ছপ শব্দ শুনতে পেলাম। কোনো জানোয়ার জল মাড়িয়ে হেঁটে
যাচ্ছে! কি জানোয়ার জানি না, কিন্তু জানোয়ারটা বাঁ দিক
থেকে ডানদিকে হেঁটে আসছে। যে ভাবে শব্দটা এগিয়ে
আসছে আর থামছে, তাতে কয়েক সেকেন্ডের মধ্যেই মাছরাঙা
পাখিটা যেখানে বসেছিল তার সামনে এসে পৌঁছবে
জানোয়ারটা। কি জানোয়ার? হরিণ? শম্বর? শুয়োর?
বাঘ?

আমি নিঃশ্বাস বন্ধ করে ফেললাম।

রাইফেলটাকে এগিয়ে দিয়ে কাঁধে তুলে নিলাম। কাঁধে
তুলে নিয়ে মাছরাঙাটা যে ভেসে-আসা কাঠে বসেছিল, সেই
কাঠে নিশানা নিলাম। যে জানোয়ারই হোক সে ঐ কাঠের
সামনে এলেই আমি তাকে গুলি করতে পারব। কিন্তু

সেফটি-ক্যাচ অনু করিনি। বর্নাটা এত কাছে, আমার থেকে দশ হাত দূরেও নয়; এখানে সেফটি-ক্যাচ অনু করলেই শব্দ হবে। তাই এখন আর উপায় নেই।

খুব শক্ত করে ধরে রাখলাম রাইফেলটাকে, আর ডান হাতের বুড়ো আঙুল রাখলাম সেফটি-ক্যাচের উপরে, যাতে গুলি করতে হলে সেফটি-ক্যাচ ঠেলে সঙ্গে সঙ্গে নিশানা না-সরিয়েও গুলি করতে পারি।

আওয়াজটা আরো একবার হল। জানোয়ারটা আরো কিছুটা এসে থমকে দাঁড়াল। তারপরই জলে চাক্ চাক্ চাক্ চাক্ শব্দ শুনতে পেলাম।

আমার হৃৎপিণ্ড বন্ধ হয়ে এলো। বাঘ!

এমন জোর শব্দ করে বাঘ ছাড়া আর কোনো জানোয়ার জল খায় না। রাইফেলের ব্যারেলের রিয়ার-সাইট আর ফ্রন্ট-সাইটের মধ্যে দিয়ে চেয়ে, স্বল্প অফ ছা বাটের সঙ্গে গাল ছুঁইয়ে ছুঁ চোখ খুলে আমি সেই দিকে তাকিয়ে রইলাম।

জল-খাওয়া সেরে জানোয়ারটা আবার চলতে শুরু করল। এসে গেছে; এসে গেল।

তার পরমুহূর্তেই দেখলাম একটা বিরাট বাঘ। তার বৃকে একটা প্রকাণ্ড রক্তাক্ত ক্ষত, সেখান থেকে তখনও রক্ত বেরিয়ে আসছে, বড় বড় হলদে সাদা লোমের সঙ্গে রক্ত আর জল মাখামাখি হয়ে গেছে।

বাঘটার মাথাটা যেই কাঠটার কাছে এল, আমি সেফটি-ক্যাচ অনু করেই টি-গারে হাত দিলাম। এবং সঙ্গে সঙ্গে সেই শব্দে বাঘটা আমার দিকে মুখ ফেরাল। আর এক সেকেন্ডও

দেবী না করে আমি টিগারে চাপ দিলাম। গুলির শব্দের সঙ্গে সঙ্গে ঝপাং করে জল ছিটিয়ে বাঘটা জলে পড়ে গেল। তাড়াতাড়ি বোর্ট খুলে চেম্বারে নতুন গুলি এনে আমি সেই দিকে তাকালাম। দেখলাম, বাঘটা মাছরাঙা পাখিটা যেই কাঠে বসে ছিল, সেই কাঠেই হেলান দিয়ে যেন বসে পড়েছে। আর তার কান আর মাথার মাঝামাঝি জায়গা থেকে ফিন্‌কি দিয়ে রক্ত বের হচ্ছে।

বাঘটার বসার ধরন দেখেই বুঝলাম যে ও আর উঠবে না। কিন্তু তবুও, যেহেতু আমি শুয়ে ছিলাম এবং যদি বাঘ চার্জ করে তবে হঠাৎ ঐ শোয়া অবস্থা থেকে ওঠা সম্ভব ছিল না আমার পক্ষে, তাই কোনোরকম ঝুঁকি না নিয়ে আমি বাঘের বুক লক্ষ্য করে আরেকটি গুলি করলাম।

বাঘটা যেন একটু ছলে উঠেই বুলে গেল। যেন আর একটু আরাম করে কাঠটাতে হেলান দিল। ঠিক সেই সময় ঝর্নার বাঁ দিক থেকে অগ্ন্য একটি বাঘ প্রচণ্ড গর্জন করে উঠলো। গর্জনের শব্দের সঙ্গে সঙ্গে উপরের ডালপালা ভেঙ্গে তাকে খুব জ্বারে উন্টেদিকে দৌড়ে যেতে শুনলাম।

আমার আর টেড-এর একটি সাংকেতিক ডাক ছিল জঙ্গলের। বৌ-কথা-কণ্ড পাখির ডাক। বাঘটা মরে গেছে জেনে এবং অগ্ন্য বাঘটা কাছাকাছি আছে জেনে আমি উঠে সুঁড়িপথ দিয়ে জঙ্গলের বাইরে এলাম। এসে ফাঁকা টাঁড়ে দাঁড়ালাম।

এই জায়গাটা ফাঁকা। যেদিক দিয়েই আক্রমণ আসুক না কেন, দেখা যাবে। তাই বাঁ হাতে রাইফেলটা ধরে ডান-

হাত মুখের কাছে নিয়ে আমি বার বার বৌ-কথা-কণ্ড পাখির ডাক ডাকতে লাগলাম।

আমি জানতাম যে, এত অল্প সময়ে টেড খুব বেশী দূরে যায়নি। তাছাড়া সে আমার রাইফেলের পরপর দুটি গুলির আওয়াজ নিশ্চয়ই শুনছে। তাই টেড অল্পক্ষণেরই মধ্যেই সাড়া দেবে।

অনেকবার ডেকেও আমি যখন টেডের সাড়া পেলাম না তখন চিন্তাতে পড়লাম। বাঘটা এদিকেই আছে। টেড মিছিমিছি পুবে ঘুরে মরবে। টেড এলে আমরা দুজনে একসঙ্গে ঝনার ওপারে চলে-যাওয়া বাঘটাকে খুঁজলে তাড়াতাড়ি তার দেখা পেতে পারি।

মিনিট দশেক ওখানে দাঁড়িয়েও যখন টেডের সাড়া পেলাম না তখন মনে হল যে, টেড নিশ্চয়ই অনেক দূরে চলে গেছে।

একাই যাবো ভেবে যখন এদিকে ফিরে চলে যাচ্ছি। ঠিক সেই সময় জঙ্গলের মধ্যে খুব জোরে কিছু একটা দৌড়ে আসছে শুনতে পেলাম। তারপরই আমার প্রায় কানের কাছেই গুড়ুম করে টেডের ভারী রাইফেলের আওয়াজ শুনলাম। এবং আওয়াজের সঙ্গে সঙ্গে টেড ডানদিকের জঙ্গল থেকে এক লাফে ছিটকে বেরিয়েই দৌড়ে এল আমার দিকে। ওর চোখে মুখে ভয়।

আমি অবাক হয়ে বললাম, কি হল ?

টেড জবাব দেওয়ার আগেই দেখি টেড যেখান থেকে জঙ্গল ফুড়ে বেরোল, সেইখান দিয়ে একটা প্রকাণ্ড শব্দচূড় সাপ জঙ্গল লণ্ডণ্ড করে ফণা আর লেজ দিয়ে খোপঝাড় ভাঙতে



ভাঙ্গতে আছড়াতে আছড়াতে টাঁড়ে বেরিয়ে এল।

আমি আমার রাইফেলটা টেডএর হাতে দিয়ে একটা লম্বা শুকনো কাঠ তুলে নিয়ে দৌড়ে গিয়ে পরপর কয়েকটা বাড়ি মেরে তাকে ঠাণ্ডা করলাম।

রাইফেল দিয়ে সাপ মারার অনুবিধা অনেক। সাপ মারতে শটগান সবচেয়ে ভাল।

টেড মাটিতে বসে পড়ে হাঁপাচ্ছিল।

আমি ফিরে এসে বললাম, এত বড় শঙ্খচূড় কেউই বোধহয় দেখেনি কখনও।

টেড বলল, তোর গুলির শব্দ শুনেই আমি এদিকে দৌড়ে আসছিলাম। তারপর তুই যখন বৌ-কথা-কণ্ড পাখির ডাক দিলি, তখন দাঁড়িয়ে পড়ে সেই ডাকের উত্তর দেবো এমন সময় পেছনে শব্দ শুনে দেখি ঐ সাপটা ঝাঁটি জঙ্গল থেকে বেরিয়ে আমার পেছনে দৌড়ে আসছে।

তক্ষুনি গুলি করতে পারতাম। কিন্তু আমরা মানুষখেকো বাঘের পিছনে এসেছি, তাই গুলির আওয়াজে পাছে তারা সরে যায়, তাইই ভাবলাম, গুলি না করে দৌড়ে তোর কাছে এসে পৌঁছে যাই।

উরে স্বাস্। একটু হলেই আজ খতম হয়ে গেছিলাম। শেষকালে যখন প্রায় আমাকে জঙ্গলের কিনারে এসে ধরে ফেলল এবং লেজের উপর সমস্ত শরীরটাকে তুলে আমার মাথা সমান লম্বা হয়ে উঠে একেবারে মাথায় ছোবল দেবার উপক্রম করল তখন রাইফেলের ব্যারেলটা প্রায় তার কপালেই ছুঁইয়ে, গুলি করেই লাফিয়ে টাঁড়ে এসে পড়লাম। গুলিটা

ফণাতে না লাগলে এতক্ষণে শেষ হয়ে গেছিলাম আমি ।

তারপর দম নিয়ে টেড বলল, তুই গুলি করেছিলি কেন ?
ডাকলিই বা কেন আমাকে ? কিসে গুলি করলি ?

আমি বললাম, টাঁড়বাঘোয়া এবং তার সঙ্গিনী ছুজনেই
এদিকেই আছে । তোকে উন্টোদিক থেকে ডেকে আনবার
জন্তু শীঘ্র দিয়েছিলাম ।

ও বলল, তুই বুঝলাম । কিন্তু গুলি করলি কি দেখে ?
বললাম, বাঘ দেখে !

টেড লাফিয়ে উঠল । বাঘ ? কোথায় ?

মিস্ করেছি । পালিয়ে গেছে । এবারে চল, ওদিকেই
যাই ।

মিস্ করলি ? সিস্ ।

তারপর বলল, চল, এগোই । ঘড়িতে তখন আটটা
বেজেছে । তখনও সময় আছে হাতে অনেক ।

টেডকে সঙ্গে নিয়ে সুঁড়িপথ ধরে যখন আমি ঝর্নাটার পাশে
এসে দাঁড়ালাম তখন বাঘটাকে দেখেই টেড রাইফেল তুললো ।

আমি হাত দিয়ে ওর রাইফেলের ব্যারেল নামিয়ে দিয়ে
বললাম, বেচারি অনেকক্ষণ হল মরে গেছে ।

বাঘটার খাবার দিকে তাকিয়ে টেড চিৎকার করে উঠল,
টাঁড়বাঘোয়া, টাঁড়বাঘোয়া বলে ।

তাবপরই আমার কান ধরে খুব করে মলে দিয়ে বলল,
মিথ্যাবাদী, লায়ার, ইডিয়ট ।

বলেই, আমাকে জড়িয়ে ধরলো ছ'হাতে ।

আমি ওকে শাস্ত করে ফিস্ফিস্ করে বললাম, অণ্ড নাগটা

সামনেই গেছে । চুপ করে যা । চল এখন এগোই ।

ঝর্নার পাশ দিয়েই আমরা উঠানে চললাম । কিছুটা গিয়েই, যেখান থেকে বাঘিনীর আওয়াজ শুনছিলাম সেখানে পৌঁছেই আমরা থমকে দাঁড়ালাম ।

ঝর্নার পারে, বালির মধ্যে একটা বড় কালো পাথরের উপর থেকে টিকায়ত আমাদের দিকে তাকিয়ে আছে । টিকায়ত মানে, টিকায়তের মুণ্ডটা ।

কেউ যেন দা দিয়ে কেটে পাথরে বসিয়ে রেখেছে সেটাকে । চোখ ছুটো খোলা—ডাব ডাব করে তাকিয়ে আছে ।

আমি ভয়ে টেডকে জড়িয়ে ধরলাম ।

টেড বমি করার মত একটা শব্দ করল ।

তারপর আমাকে হাত ধরে নিয়ে এগোল সামনে । একটু সামনেই নদীর পারে টিকায়তের শরীরের ছুটি অংশ হৃদিকে পড়ে আছে । রক্ত, আর বালি আর সাদা লাল শাড়ির টুকরোতে, কাল বিকেলের ঘোড়ায় চড়া লম্বা-চওড়া লোকটার কথা ভেবেই ডাক ছেড়ে কাঁদতে ইচ্ছে করছিল আমাদের ।

ঝর্নাটা থেকে আমরা এখন প্রায় মাইলখানেক চলে এসেছি । এখানে জঙ্গল খুবই ঘন । এই সকালেও মনে হচ্ছে গভীর রাত । এমনই অন্ধকার ভিতরটা ।

পুরো পথই আমরা ভিজ্জে জায়গায় বাঘের পায়ের দাগ দেখে এসেছি । কিন্তু রক্ত কোথাও দেখিনি । আশ্চর্য! এখন নিচে এত ঝোপঝাড় এবং ঘন ঘাস যে পায়ের দাগ দেখা যাচ্ছে না । জায়গাটা একটা দোলা মত । একটা বড় পাহাড়ী নদী বয়ে গেছে ছায়ায় ছায়ায় । তাই এত গাছ পাতা ঘাস

এই গরমের সময়েও। নদীতে জলও রয়েছে এক হাঁটু মত।
শ্রোতও আছে।

টেড ফিসফিস করে বলল, একটু জিরিয়ে নেওয়া যাক।
বুদ্ধিও ভাঁজতে হবে,—এই বলে একটা বড় পাথরের উপর বসল
টেড। আমিও বসলাম। কিন্তু উন্টো দিকে মুখ করে।

টেড বলল, এখন সাড়ে দশটা বাজে। এখানে আমরা
কিছুক্ষণ চুপ করে বসি। ভালো করে শোন্ কোনো আওয়াজ
শোনা যায় কি না। মিছিমিছি হেঁটে লাভ কি ?

ওয়াটার বটল থেকে একটু জল খেলাম আমরা।

টেড পকেট থেকে একটা চকোলেট বের করে আমার
পিছনদিকে হাত ঘুরিয়ে আধখানা এগিয়ে দিল।

ঐ জায়গাটার একদিকে ঘন বাঁশের জঙ্গল। বেশীর ভাগই
খড়িহি বাঁশ। দমকে দমকে হাওয়া উঠছে বনের মধ্যে আর
বাঁশবনে কারা যেন ফিস্ফিস্ করে কথা বলছে। কটকট্
করে আওয়াজ হচ্ছে বাঁশবন থেকে।

মিনিট দশেক ওখানে বসে থাকার পর হঠাৎ আমার
ডানদিক থেকে ও টেডের বাঁদিকের ঘন জঙ্গল থেকে ছপ-হাপ
করে হনুমানের ডাক শোনা গেল। মনে হল, কিছু একটা
দেখে ওরা খুব উত্তেজিত হয়েছে। হনুমানগুলো আমরা
যেখানে বসেছিলাম, তার থেকে বড় জোর ছুশো গজ দূরে
ছিল।

আমরা কান খাড়া করে সেই দিকে চেয়ে রইলাম।
দেখলাম, হনুমানগুলো ডালে ডালে ঝাঁপাঝাঁপি করতে করতে
ক্রমশঃ আমাদের দিকেই এগিয়ে আসছে ঘন-সবুজ পাতার

চাঁদোয়ার মধ্যে মধ্যে ।

আমি আর টেড তাড়াতাড়ি কিন্তু নিঃশব্দে বড় পাথরটা থেকে নেমে ছুটো পাথরের আড়ালে গুঁড়ি মেরে বসলাম । একটু পরই কোনো জানোয়ারকে ঝোপঝাড়ের ভিতরে আসতে শোনা গেল । এই জায়গাটা ভিজ়ে থাকায়, শুকনো পাতা মাড়ানোর খচ্‌মচ্‌ আওয়াজ হচ্ছিল না ।

একটু পরই সেই আওয়াজটা থেমে গেল । তারপর আবার আড়ালে আড়ালে আওয়াজটা ফিরে গেল । হুম্মান-গুলোও এতক্ষণ টিকিট-না-কেটে রাম্পার্টে চড়ে মোহনবাগান-ইন্স্‌ট্‌বেঞ্জলের খেলা দেখার আনন্দে মশগুল সাপোর্টারদের মত চেঁচামেচি লাফালাফি করছিল । গাছের মাথায় মাথায় ঐ আওয়াজটা থেমে যাওয়ার সঙ্গে সঙ্গে ওরাও চূপচাপ হয়ে গেল ।

টেড বলল বাঘ কিংবা চিতা ।

আমি বললাম, এ অঞ্চলে চিতা একটিও ছিল না, বলছিল বস্তীর লোকেরা ।

তাহলে তাই হবে ।

বাঘ হলে টাঁড়বাঘোয়ার সঙ্গিনী ।

টেড বলল, সঙ্গিনী কিন্তু আহত হয়নি । তুই লক্ষ্য করেছিলি যে এতখানি পথের সব জায়গায় পায়ের চিহ্ন থাকলেও রক্ত কোথাওই আমরা দেখিনি ।

তা ঠিক ।

টিকায়োতের সঙ্গে লোকহুটো ভুলও দেখে থাকতে পারে, আমি বললাম ।

টেড বলল, যদি এই বাঘিনী মানুষখেকো না হয় তবে তাকে কি আমাদের এখুনি মারা উচিত? মাচায় উঠে টিকায়তকে মেরেছিল—তা স্বাভাবিক বাঘেও মারে। ওটা রাগের মার। যে গুলি করেছে বাঘয় দেখিয়েছে; তাকে শাস্তি দেওয়া আর মানুষখেকো হয়ে যাওয়া এক জিনিস নয়।

আমি বললাম, তা ঠিক। কিন্তু পরে যদি দেখা যায় যে এই বাঘিনীও মানুষখেকো?

তাহলে আমরা আবার ফিরে আসব। মলয়ামিলনে পলাশবনার লোকেরা ইচ্ছে করলেই যেতে পারে। তাছাড়া কোলকাতার ঠিকানাও ওদের দিয়ে রাখব। ওরা খবর দিলেই আসব। কিন্তু আন্দাজে মানুষখেকো ভেবে বাঘিনীকে মারা আমার মনঃপূত নয়।

তারপর টেড আবার বলল, একটা কাজ কর। তুই জ্বোরে গলা ছেড়ে গান গা। আমিও জ্বোরে জ্বোরে কথা বলব। যদি মানুষখেকো হয় তবে তাকে আমরা জানান দিয়ে এখান থেকে ফিরে চলি চল। মানুষখেকো হলে, সে হয়ত আমাদের পিছু নেবে।

আমি বললাম, পেট ত ভর্তি। পিছু নাও নিতে পারে। তাছাড়া, গুলির শব্দ শোনার পরও দিনের বেলায় আমাদের পিছু পিছু যাবেই যে, এমন কি কথা আছে?

টেড বলল, সেটাও ঠিক। তবুও আমার মন সায় দিচ্ছে না। চল আমরা ফিরে যাই আজ। তাছাড়া, টিকায়তের শরীরের অংশ আর মাথাটা নিয়ে যেতে হবে সঙ্গে করে। দাছ করার জগে।

আমি বললাম, তা ঠিক ! কিন্তু কি করে নেব ? আমার
যে ভাবতেই ভয় করছে ।

টেড বলল, ওর ছেলেটার কথা ভাব । শরীরের কোনো
অংশ না নিয়ে গেলে ত তাদের হিন্দুমতে মৃতের সংকারই
হবে না ।

তা ঠিক ।

টেড বলল, কি হল ? গান গা ।

আমি জ্বোরে গাইতে লাগলাম :

“ধন ধাণ্ডো পুষ্পে ভরা, আমাদের এই বসুন্ধরা,

তাহার মাঝে আছে যে দেশ, সকল দেশের সেরা ।

স্বপ্ন দিয়ে তৈরী সে যে, স্মৃতি দিয়ে ঘেরা ।”

টেড সঙ্গে শীঘ্র দিতে লাগল । আমরা কাঁধের উপর দিয়ে
পিছনে নজর রাখতে রাখতে আস্তে আস্তে ফিরতে লাগলাম ।

আধ মাইল যাওয়ার পরও কোনো কিছু যে আমাদের
পিছু নিয়েছে এমন বোঝা গেল না ।

আরও আধ মাইল চলার পরও না ।

টেড বলল, ঠাখ্ আমার মন বলছে বাঘটা ভাল । দেখিস ।
ও রাগের মাথায় একটা খুন করে ফেললেও আর কখনও
মানুষ খাবে না ।

আমরা যখন টাঁড়বাঘোয়ার কাছে এসে পৌঁছলাম তখন
দেখে আশ্চর্য হলাম যে তার গায়ে একটি তীরও যে লেগেছে
এমন দাগ নেই । টেড আর আমি আমাদের জামা খুলে
তার মধ্যে করে টিকায়ের মাথা আর পেটের কিছুটা অংশ
মুড়ে নিলাম । এবারেও টিকায়ের মূখের দিকে তাকিয়ে

মনে হল, যেন টিকায়ত নীরব চোখে বলছে, বাজীতে হার হয়েছে আমার। ছেলেমানুষ তোমরাই জিতে গেলে।

টেড বলল, যদি তীর লাগার কথাটা মিথ্যা হয়, তাহলে বাঘিনী যে টিকায়তের মাংস খেয়েছে, আধখানা মুখে করে নিয়ে গেছে এও মিথ্যা হতে পারে। চল্ ফিরে চল্। গ্রামের লোকদের সঙ্গে পরামর্শ করি। যদি আর কোনো অত্যাচার হয় গ্রামে তখন ত আমরা আছিই।

বেচারি টাঁড়বাঘোয়া!

তার কোনো দোষ ছিল না। সে এ গ্রামের প্রহরী ছিল। যদি না টিকায়ত তার খাবাটাকেই ভেঙ্গে দিত তাহলে সে বেচারার মানুষের ক্ষতি করার কোনো প্রয়োজনই ছিলো না।

এখন ছপুর দেড়টা বাজে। ক্ষিদে পেয়েছে প্রচণ্ড। গ্রামে ফিরে টাঁড়বাঘোয়াকে নিয়ে আসার, চামড়া ছাড়াবার বন্দোবস্ত করতে হবে, টিকায়তের সংকারের সময় সামনে থাকতে হবে; এখন অনেক কাজ আমাদের।

আমি বললাম, চল্ টেড, যাওয়া যাক এবার।

টেড বলল, যাবি যাবি। মানুষকে বাঘ মারলি তুই। এই জায়গাটাতে একটু বসে থাকি। মিনিট দশেক জিরিয়ে নিই।

তারপর বলল, কি করে মারলি বল ত শুনি।

আমি বললাম, মানুষকে যদি টিকায়তকে না মারতো তাহলে আজ সত্যিই আনন্দের দিন ছিল। মনটা এত খারাপ হয়ে গেছে যে, কিছুই আর ভাল লাগছে না।

টেড বলল, যা ঘটে গেছে এবং যে-সম্বন্ধে আমাদের কিছুমাত্র করণীয় নেই ; সেই আলোচনা করে লাভ কি ? বলু ত তুই, কি করে মারলি, কোথায় দেখলি ওকে ? গুলি খেয়ে কি করল টাঁড়বাঘোয়া ?

টেড টাঁড়বাঘোয়ার দিকে মুখ করে নদীর বালিতে বসেছিল । আর আমি টাঁড়বাঘোয়ার পাশে একটা পাথরে ।

টেডএর কথার উত্তরে আমি কথা বলব, ঠিক এমন সময় হঠাৎ আমার চোখ পড়ল টেডএর চোখে । টেডএর চোখ ছুটো সজাগ হয়ে উঠেছে, কান উৎকর্ষ, টেড আমার পিছনের জঙ্গলে তীক্ষ্ণ দৃষ্টিতে যেন কী দেখছে !

আমি ওর দিকে আবার তাকাতেই ও ঠোটে আঙুল দিয়ে চূপ করতে বলল আমাকে ।

আমি লক্ষ্য করলাম যে, আমার রাইফেলটা আমার হাতে নেই । টেডএর পাশে একটা পাথরে রেখে এসেছিলাম রাইফেলটা ।

টেডএর হাতে রাইফেল তার শক্ত মুঠিতে ধরা । ও আমার পায়ের দিকে মুখ করে আছে, আমাকেই দেখছে যেন, এমন ভাব করছে আসলে তাকিয়ে আছে আমার পিছনে ।

হঠাৎ ঝর ঝর করে মাটি আর হুড়ি পাথর খসে পড়ার আওয়াজ হল আমার ঠিক পিছনে ।

আমি বুঝলাম কোনো জানোয়ার আমার ঘাড়ে লাফাবার মতলব করছিল, কোনো কারণে সে পা পিছলে অথবা ইচ্ছে করে সরে গেছে ।

টেড স্বাভাবিক গলায় বলল, আর চূপ করে থাকার দরকার

নেই। ভাব দেখা যেন কিছুই হয়নি। সেই গানটা গা-না, যেটা গাইছিলি একটু আগে।

আমার পিছনে নিশ্চয়ই বাঘিনী। হাতে রাইফেলও নেই। আর টেড গান গাইতে বলছে। কিন্তু নিরুপায় আমি। নিশ্চয়ই গান গাওয়াটাও এখন দরকার। তাই জ্বোরে আবার গান ধরলাম আমি, 'খনধাগে পুস্পে ভরা আমাদের এই বসুন্ধরা...।'

হঠাৎ আমাকে চমকে দিয়ে ডানদিকে উপড় হয়ে শুয়ে পড়েই টেড আমার গায়ে যাতে গুলি না লাগে এমনভাবে রাইফেলটা কাঁধে তুলেই গুলি করল। গুলি করতেই, প্রচণ্ড ছংকার শুনলাম আমার পিছনের জঙ্গলে। এবং সঙ্গে সঙ্গে আমি ওখান থেকে লাফিয়ে সামনে পড়ে আমার রাইফেলটা হাতে তুলে নিলাম।

টেড দৌড়ে উশ্টোদিকের পাড়ে ওঠার চেষ্টা করছিল। আমিও দৌড়ে ওব ডানদিকে গিয়ে দাঁড়ালাম।

দাঁড়িয়ে, তাকিয়ে রইলাম সেদিকে, যেদিক থেকে গর্জন করেছিল বাঘিনী। কিন্তু আমাদের আর খুঁজতে হল না তাকে। গাছপালা ঝোপঝাড় কামড়ে-আঁচড়ে ভেঙ্গে-চুরে মাটি পাথর সব উপড়ে ফেলে বাঘিনী যে কী প্রলয় উপস্থিত করলো তার বর্ণনা লিখতেও আজ এত বছর পরেও হাত ঘেমে উঠছে আমার।

টেডএর গুলি বাঘিনীর পিঠ আর পেটের মধ্যে মেরুদণ্ডে লেগেছিল। তবে তার গর্জন এবং যন্ত্রণা বেশীক্ষণ স্থায়ী হল না। টেডএর হেভী রাইফেলের আয় একটি গুলি ততক্ষণে তার

কাঁধ দিয়ে ঢুকে বুকের ডানদিক দিয়ে বেরিয়ে গেছিলো।
আমার রাইফেলের একটি গুলি লেগেছিল তার মাথার
পেছনে।

আমি যে জায়গাতে গিয়ে পৌঁছেছিলাম সেখান থেকে
মাথার পেছনটাই দেখা যাচ্ছিল শুধু।

বাঘিনী শাস্ত হলো অনেকক্ষণ থর্ থর্ করে কঁপে।

যাঁরাই নিজেরা গুলি করে কখনও কোনো জানোয়ার
মেরেছেন, সে মানুষথেকে বাধই হোক, আর যাইই হোক,
তাঁরাই জানেন যে, সেই জানোয়ার যখন মারা যায় তখন বড়
কষ্ট হয়। মনটা বড়ই খারাপ হয়ে আসে। কিন্তু এবারে
আমাদের টাঁড়বাধোয়া আর তার সঙ্গিনীকে না মেরে উপায়
ছিলো না।

টেড ধেই ধেই করে লাফাতে লাগল, 'ঢানা ঢাশো ফুফে
বারা আমাডের বশুগুরা' বলে গান গাইতে গাইতে।

আমি বললাম, কী সাংঘাতিক চালাক দেখেছিস বাঘিনী।
একটু হলে ত আমাকে খেয়েই ফেলত!

টেড বলল, চালাকেরও বাবা থাকে। বাঘিনী আমাদের
কোথা থেকে ফেলা করছিল বল ত?

কোথা থেকে?

সেই যেখানে হনুমানরা ফিরে গেল, আমরা ভাবলাম,
জানোয়ারটাও ফিরে গেল, সেইখান থেকে। ওটা ওর একটা
কায়দা। তখনই আমার সন্দেহ হয়েছিলো। তাকে কিছু
বলিনি। ভেবেছিলাম, সময় মত বলব। কিন্তু যে বাঘিনী
অতগুলো গুলির শব্দ শোনার পরও ভর ছুপুরে ছু ছুজন

শিকারীকে এতখানি ফলো করে আসে সে নতুন নয়। এখন
আমার মনে হচ্ছে কি জানিস? মনে হচ্ছে টাঁড়বাঘোয়া
একটি মানুষও খায়নি। সবই এই বাঘিনীর কাজ। তা না
হলে ছাখ্ টিকায়ের গুলি ত খেয়েছিল সে গত বছর গরমের
সময়। এই গত একবছরে একজনকেও সে খরল না কেন?

ভাববার মত কথা, আমি বললাম।

তারপর বললাম, আমরা দুজনেই ত সমান অধরিটি।
তার চেয়ে চল, কোলকাতায় ফিরে ঝজুদাকে ভাল করে সব
বলে ব্যাপারটা আসলে কি তা জিজ্ঞেস করব।

টেড বলল, নট্ আ ব্যাড আইডিয়া।

তারপর বলল, আর এখানে নয়। এবার তাড়াতাড়ি
ফেরা যাক। অনেক কাজ বাকি আমাদের; গ্রামের
লোকদের।

আমি বললাম, টিকায়ের সঙ্গী দুজনকে ধরে ঠ্যাঙাব
কিন্তু আমি। মিথুক পাজী লোকগুলো।

টেড বলল, ওদের ঠ্যাঙানোই উচিত।

যে জায়গাটা দিয়ে আমরা তখন যাচ্ছিলাম, সেই জায়গাটা
খুব উঁচু।

ওখানে দাঁড়িয়ে দারুণ দেখাচ্ছিল নিচের পলাশে পলাশে
লাল-হয়ে-যাওয়া পলাশবনা বস্ত্রী, তার আশেপাশের জঙ্গল
আর টাঁড়কে; ছুপূরের আলোতে।

আঁধি উঠছে। ধুলোর মেঘের আস্তরণে ছেয়ে গেছে
চারদিক। রুধু হাওয়ায় নাক চোখ জ্বালা জ্বালা করে।
অথচ ভালোও লাগে। দমক্ দমক্ হাওয়ায় মছয়া করোজ

আর নানা ফুলের মিশ্র গন্ধ ভেসে ভেসে আসছে ছুটোছুটি করে, মনে হচ্ছে যেন কোনো খেলায় মেতেছে ওরা ; কে কার আগে এসে পৌঁছবে ।

গরু চরছে বস্তীর মাঠে, প্রাস্তরে, মুরগী ছাগল ডাকছে । আটার কলে গম পেঘাই হচ্ছে, তার পুপ্ পুপ্ পুপ্ পুপ্ আওয়াজ দূর থেকে ভেসে আসছে হাওয়াতে । লালরঙা হনুমান ঝাণ্ডা উড়ছে অশ্বখ গাছের মগডাল থেকে । কৃষ্ণ উদাস প্রকৃতি, বড় গরীব কিন্তু বড় ভালো মানুষজন ; কী শাস্তি চারদিকে !

চলতে চলতে নিচে তাকিয়ে আমি ভাবছিলাম, বন-পাহাড় ঘেরা এই শাস্তির বস্তী পলাশবনাতে হুজুর রাজা ছিলো । একজন টিকায়ত । আর অগুজন টাড়াবাঘোয়া । যদিও একেবারেই আলাদা ছিলো তাদের রাজত্বের রকম, তাদের প্রজাদের চেহারা । তাদের চরিত্র । কিন্তু এই দুই রাজার মধ্যে সত্যিকারের কোনো ঝগড়া ছিলো না । হুজুরেই হুজুরকে চিরদিন সমীহ করে চলত । ভুল বোঝাবুঝির জগ্নেই এই ছপুরে তারা হুজুরেই এক মর্মান্তিক ঝগড়ার পরিণতির শিকার হয়ে জঙ্গলের মধ্যে এক অনামা নদীর ঝর্নার পাশে শুয়ে রয়েছে ক্ষতবিক্ষত রক্তাক্ত হয়ে, বালিতে পাথরে, জলে মাটিতে ; রোদে ছায়ায় ।

একই সঙ্গে ।

টেড আমার আগে আগে চলছিল ।

আমি টেডকে বললাম, আমার কি মনে হয় জানিস ? মনে হয়, সমস্ত ঝগড়া, যতরকম ঝগড়া হয়, হয়েছে আজ পর্যন্ত

এবং হবে মানুষে মানুষে, দেশে দেশে এবং একদিন হয়ত এক
গ্রহের সঙ্গে অণু গ্রহের, সেই সমস্ত ঝগড়ার পিছনেই একটাই
মাত্র কারণ থাকে ; ভুল বোঝাবুঝি ।

ভারী দুঃখের । তাই না ?

টেড এখন কোনো কথাই শুনতে রাজী নয় । ও ওর
রাইফেলটা বাঁ কাঁধে ফেলে মাথার চুল ঝাঁকিয়ে বড় বড় পা
ফেলে গান গাইতে গাইতে এগোচ্ছিল—‘চন চাম্লে ফুফে বারা
আমাদের বশুণ্ডরা ।...’
